

# Wantok

Mosbi prais 25t  
Arapela provins 30t

Namba 606 — Wik 1 stat long 1 Februari, 1988

## Oro kisim K50 milion long wol Beng

WOL BENG bai givim K50 milion helpim mani long kirapim bikpela agrikalsa projek insait long Noten Provins namel long dispela yia.

Ol lida bilong Noten Provins i bungim maus na welkamim tok orait bilong dispela projek long dispela wik Trinde. Oro Primia, Dennis Kageni; Minista bilong Difens, Steven Tago; Namba Tu Spika bilong Palamen, Akako Doi na palamen memba bilong Sohe, McKenzie Jovopa i promis long sapatim projek. Na ol i putim kamap 4-pela astingting bilong bringim kamap dispela bikpela projek.


1. Ol lida bilong Nesenel Gavman, Oro gavman i mas stretim olgeta toktok na plen bilong projek wantaim Wol Beng. Na tok klia i mas kamap long lokal pipel bilong provins.

2. I mas i gat gupela tok klia long kain sevis o helpim dispela projek bai mekim kamap long Noten Provins na tu long PNG.

3. Olgeta mani i mas go stret long projek i mas skulim ol lokal pipel o bisnis grup long gupela rot long lukautim kain bisnis i kamap aninit long projek.

4. Dispela projek i mas yusim bikpela namba bilong wokman bilong Noten Provins pastaim. Sapos provins i sot long sampela saveman bilong wok didiman, ol i ken kisim pipel ong arapela provins long kirapim dispela projek.

Ol dispela lida bilong Noten Provins i pasim tok long wok wantaim na bringim ol astingting o aslo bilong Nesenel Gavman, provinsal gavman na ol lokal pipel.



## Ol 24,231 pikinini no gat spes long skul

PAPUA Niugini bai gat 24,231 studen bilong Gret 6 i nogat ples long haiskul long dispela yia.

### BEN WAUNS i raitim

Ol dispela studen i stap namel long 38,994 skul pikinini bilong Gret 6 husat i wokim fainal skul tes long las yia. I gat spes long kisim 14,763 studen i go insait long Gret 7 long haiskul insait long olgeta hap bilong PNG. Na ol dispela 24,231 studen husat i popaia long kisim spes i mas hatwok long kisim ples insait long vokesenel senta, Koles bilong Ekstenel Stadi (COES) na arapela senta bilong kisim trening.

I gat tok klia i kamap long olgeta vokesenel senta long dispela wik Trinde, olsem ol i gat spes long 3,773 studen tasol long dispela yia. Tasol Nesenel Edukesen bot i bilip bai sampela vokesenel senta i gat spes long kisim sampela studen moa. Dispela i min olsem moa long

10,000 arapela studen bai stap nating long ol taun eria o helpim papamama long asples.

Insait long 8,846 studen husat i pinisim Gret 10 insait long 109 haiskul bilong PNG long las yia, i gat 5,725 man studen na 3,121 meri studen. Namel long dispela lain studen, i gat spes bilong kisim 700 studen i go long Gret 11 insait long 6-pela Nesenel Haiskul. Na bikpela hap namba bilong ol bai kisim wok, sapos ol i laki.

Sentral Seleksen Yunit bilong Edukesen Dipatmen i wok long bungim ripot bilong lain studen husat bai go long nesenel haiskul, painim wok insait long ol kampani, gavman dipatmen, yunivesiti na arapela koles. Ol wokman bilong dispela yunit i no inap tok kila stret long hamas studen i no laki. Long wanem ol hatwok yet long kisim ol ripot na stretim rot bilong helpim ol studen i painim wok.

I gat 790 studen i pinisim Gret 12 long las yia. Tasol em hat

tru long painimaut long namba bilong lain studen husat bai gohet long yunivesiti o koles o painim wok. Opis bilong Haia Edukesen long Waigani i wok hat nau long bungim ripot bilong dispela samting.

Long dispela wik, i gat bikpla tok pret i kamap long Sentral Seleksen Yunit na Haia Edukesen opis olsem bai moa long 5,000 Gret 10 na 12 studen i nogat sans long painim wok o gohet long bikpela skul. Long wanem namba bilong ol studen i bikpela moa i winim ol spes.

Dispela wok bilong sekap, stretim rot, painim spes na bungim ripot insait long Edukesen opis long Waigani i gohet nau. Ol i bilip bai planti studen i no inap kisim tok klia long aplikesen bilong ol i go inap long mun Mas. Long wanem Edukesen opis i mas kisim bekim bilong aplikesen i kam long ol koles, ol pravit kampani na ol gavman dipatmen husat i kisim aplikesen bilong ol studen pastaim. Na bihain ol i ken tok save.



□ Minista bilong Envaironmen and Konsevesen, Avusi Tanao na tupela opisa bilong em i lukluk raun long ol viles na viles pipel long hap bilong Woitape, Sentral Provins. Lukim ful sotri long pes 2.

## Somare na Momis i raun nau

BIKPELA AIDIA bilong Melanesian Alaiens Pati na Pangu long bung wantaim na kamapin long 1987 ileksen i stap pinis nau long Niugini Ailans.

Tupela lida bilong Pangu na MA, Mista Somare, Oposisen lida na namba-tu bilong em Pater John Momis i raun nau

long Nu Ailan Provins.

Pater Momis i go long Manus long Sande 26 Janueri. Na em i toktok wantaim primia Steven Pokawin. Bihain em i lukluk raun long ol gavman projek long Lorengau. Na em i toktok wantaim ol pipel bilong Manus tu.

Oposisen lida, Mista Somare i bungim Pater Momis long Kavieng, Nu Ailan Provins long Trinde, 29, Janueri. Tupela lida bilong MA na Pangu nau putim het wantaim long kempein.

Pater Momis wantaim Somare bai i stap insait long kibung bilong ol

Niugini Ailans primia.

Dispela tupela wik kibung bai i pinis long Fraide, 14, Februeri. Mista Somare wantaim Pater Momis bai raun long olgeta hap bilong Nu Ailan a toktok long ol pipel na lukluk long wanem projek long Nu Ailan.

NIUPELA  
IKAM LONG  
Paradise

Tropikol fleva insait long bisket  
PINEAPPLE  
CRUNCH





# PLIS Ripot



■ **PLIS** long Wewak i holimpasim pinis wanpela man na sasim em long tripela rong em ol i bilip em i mekim.

Man ya em Augustine Kami, 48 krismas bilong Sawi Viles, Angoram, Is Sepik Provins. Plis long Wewak i sasim em long slip wantaim pikinini meri bilong em, long tok nogut na long mekim toktok bilong pretim narapela man.

Plis i tok, man ya i slip wantaim pikinini meri bilong em 4-pela taim na meri bilong em yet i bin kotim em long plis.

Man ya i stap nau long rumgat long Boram bihain long taim em i kamap liklik taim tasol long Wewak Distrik Kot long 16 Januери.

■ **PLIS** Komisina David Tasion i kamapim pinis nem bilong 8-pela kalabus husat i bin ranawe long Bion Haus Kalabus long Madang.

Mista Tasion i tok olsem plis i bilip olsem dispela 8-pela kalabus husat i ranawe inap kamapim bikpela birua long ol gutpela sitisen. Em i singaut long publik long helpim plis na holimpasim gen ol dispela trabelman.

Em i tok, plis bai givim mani long husat man i givim trupela toksave long wanem hap plis i ken painim ol dispela lain sapos plis i laik. Em hia nem bilong ol kalabus: Moses Kauri Tukai, Kofi Viles, Wewak; Kasom Burugen, Yabob Viles, Madang; Leon Wavi Dumoi, Dame Viles, Angoram; Nicko Meraute, Wes Irian; Metric Womningi Numbap, Aibima Viles, Maprik; Nickie Jack Peltam, Gua Viles, Bogia; Joseph Sap Kala, Parimbe Viles, Ambunti.

■ **MOSBI** plis i holimpasim gen 5-pela kalabus husat i bin ranawe bipo. Ol i painim ol insait long ol setelmen long Mosbi siti long Mande 27 Januери long taim plis 'Force Ten' i go pas long dispela wok.

Long dispela taim tu, ol plisman bilong 'Force Ten' i painim tu planti samting em ol i bilip sampela man i bin stilim na putim long ol dispela setelmen.

Ol dispela 5-pela kalabus em 'Force Ten' i bin holim ol em: Andrew Laiam 26 krismas bilong Lalamaita Viles, Tapini, Sentral Provins; Peter Kire, 21, bilong Tawuni Viles, Tapini; Alphone Amai, 27, Tawuni Viles, Tapini; Kamo Amai, 26, Tawuni Viles, Tapini na Manu Peto, 20, Tawuni Viles long Tapini tu.

■ **PLIS** long Maun Hagen i tambu pinis long bikpela namba bilong manmeri i mekim protes mas. Plis i tok ol i no laikim ol pipel i protes, sapos ol i gat belpen long dai bilong wantok bilong ol long trabel pait o kain viles pait olsem.

Plis i mekim dispela tokaut bihain long bikpela grup demonstresen i bagarapim ol windua na haus na banis bilong ol bisnis haus long Hagen Taun las Sarere.

## Vanapa na Brown Riva bai kamapim lektrik pawa

WARA long Vanapa na Brown Riva long Sentral Provins i ken ranim smatpela wara saplai na lektrik pawa i go long Mosbi siti na arapela rural eria long provins.

Dispela tok klia i kamap bihain long lukluk raun bilong Minista bilong Envaironmen na Konsevesen, Mista Avusi Tanao long las wik Fonde.

Em i bin lukluk raun long sampela wok projek bilong opis bilong wara risoses long sampela hap bilong dispela tupela bikpela wara.

Mista Tanao wantaim sampela wokman bilong dispela opis i sekap long sampela

haus masin bilong makim strong bilong wara. Na ol i lukluk long sampela gutpela ples bilong kirapim liklik pawa stesin.

Ol i bin lukim Senia Distrik Opisa long Woitape distrik hetkota. Na ol opisa bilong Woitape wantaim lain wokman bilong wara risoses opis i tokim Mista Tanao long plen bilong kirapim wanpela liklik haidro-pawa stesin long givim gutpela sevis, bilong Woitape.

Ol wokman bilong wara risoses opis i tokaut olsem planti wok painimaut bilong ol i soim sampela gutpela ples bilong sanapim haidro-pawa

stesin long Vanapa na Brown Riva. Ol i bilip ol dispela stesin i ken givim ekstra pawa saplai i go long Mosbi siti, sapos siti eria i kamap bikpela long bihaintaim. Na sampela liklik pawa stesin i ken sevim planti rural eria na ol lokal bisnis projek.


Ol dispela wok traime bilong Biuro long dispela tupela wara bai helpim wok painimaut bilong arapela saveman (consultants) bilong gavman na praivet kampani. Ol dispela saveman bai sekap na skelim rot bilong larim gavman i kirapim bikpela pawa stesin na wara saplai dam long sampela yia bihain.



3. (Antap) Hia em i wanpela otomatik masin bilong makim renwara i stap long Ononge Misin stesin.



3. (Daunbilo) Mista Tanao (lephan) i kisim tok klia i kam long tupela opisa Biruo long plen bilong liklik pawa stesin.



1. Minista bilong Envaironmen na Konsevesen, Mista Avusi Tanao wantaim sampela wokman bilong Biuro i sanap long Suria ples balus. Ol i lukluk long ples bilong sanapim wanpela otomatik masin bilong skelim mak bilong renwara.

# Nupela takis bilong Sandaun

SANDAUN PROVINSAL Gavman bai i stat long kisim takis long ol samting ol i salim long ol stua insait long Wes Sepik.

Provinsal Minista bilong Fainens Mista Piamnok Langurengim i bin tokaut long dispela takis long dispela wik. Mista Langurengim

i bin tok olsem Sandaun Provinsal Asembli i bin oraitim ol lo bilong givim pawa long Sandaun provinsal gavman bilong kisim ol takis insait long provins.

Dispela lo i kam aninit long seksen 58 bilong lo i bosim ol provinsal gavman. Mista langurengim i ting olsem ol bai inap long kisim K40,000 long ol dispela takis bilong helpim provinsal bilong 1986.

Mista Langurengim i bin tok tu olsem ol i kamapim pinis wanpela provinsal opis bilong kisim takis na tu ol i makim pinis wanpela sief kolekta bilong takis na ol sampela arapela memba bilong lukautim dispela opis.

Mista Robby Uri husat i wanpela akaunten wantaim divisen bilong manesmen sevis i kamap sief kolekta. Tasol bihain

bai Provinsal Eksekutiv Kaunsil i makim wanpela opisa long lukautim dispela opis.

Mista Langurengim i tok olsem bai ol i no inap putim takis long ol guds na sevis husat i gat prais kontrol i stap long en. Ol bukstua bai i baim takis tasol ol arapela ritel stua husat i wok long odaim ol samting bilong ol i kam long ol arapela provins o kantri bai i baim takis tu.

Mista Langurengim i tok olsem bai ol i putim 2 pasen sels takis long olgeta arapela samting na sevis. Dispela i no kauntim ol samting olsem bensin na bia. Ol pe bilong ol kain kain bia na wain bai i stap olsem: Ale na arapela bia olsem Porter, Stout, Cider na ol Perry lika ol i salim long wan wan botol o long bakstua bai i karim takis inap 12 toea long olgeta wanpela lita

## Laimo i hatim Neville Bourne

NAMBA TU Premia bilong Not Solomons, Mista Michael Laimo i tokim Ekting Minista bilong praimer Industri, Mista Neville Bourne long i no ken sutim nus bilong em i go insait wok bilong ol Nesenel plantesen managemen Agensi long Not Solomons (NPMA).

Mista Laimo i tok, em i no laikim tru dispela toktok bilong Mista Bourne long wok bilong NPMA, bikos MPMA nau tasol i satim wok long Not Solomons.

Mista Laimo i tok NPMA nau tasol i stat long Not Solomons long helpim ol wan, wan papa na husat man i ranim ol plantesen long Not Solomons Provins.

Mista Laimo i welkam tru long NPMA i statim wok long provins bilong em


## Tamba TORO



KOLE I BELHAT NA GO SAUM OLGETA BOTOL NA KIAM KSO

EM KIAM MONI NA GO SENISIM GRAS BILONG EM LONG HAIR-DRESA

KOLE ILUKIM TORO WOK LONG AI GRIS LONG OL MERI OL I SAVE STAILIM GRAS...



TORO RAUN PINIS NA GO LONG HAUS... TAIM EM GO ANTAP LONG HAUS EM LUKIM KOLE NA EM TANG WANPELA MERI...

KOLE TAINIM NA EM SO-OFF LONG TORO.





# Ol sik refuji i pulap long Rumginae haus sik



MOA long 80 man na meri na pikinini long ol kem bilong ol refuji long Western Provins i slip nau long Rumginae Haus Sik wantaim bikipela sik olsem T.B.

Haus Sik long Kiunga tu i pulap pinis long ol refuji sikman. I no gat moa ples bilong ol sikan husat i kisim bikipela sik long Kiunga. Olsem na planti sikman bilong Kiunga Haus Sik tu i go pinis long Rumginae Haus Sik. Sister Gloria Atkinson, bosmeri bilong Rumginae Haus Sik i tok.

Sister Atkinson

bilong Rumginae Haus Sik i tok olsem planti refuji sikman i kisim sik T.B. Olsem na "Mipela stat pinis long givim sut bilong stopim T.B. long olgeta refuji husat i kam long kisim marasin long haus sik."

Long Janueri 16, 1986, wanpela refuji sikman i bin dai long Rumginae Haus Sik bihain long em i sik inap long sampela wik.

Sister Atkinson i tok olsem man ya em Markus Kokoya, 35 krismas bilong Fakfak Viles, Sorong Distrik long Wes Irian. Em i bin dai bihain long em

kisim sik long Niogomban Refuji Kem long Western Provins. Tasol Sister Atkinson i no tokaut long wanem kain sik Kokoya i bin kisim.

Sister Atkinson i no bin tok sapos dispela sik bilong bel solap na lek solap em Markus Kokoya i bin kisim long taim em i stap long Rumginae Haus Sik i bin kilim em o nogat.

Bihain long dai bilong Markus Kokoya, narapela samting i mekim guria ol refuji sikman long Rumginae Haus Sik i kamap long

Mande nait, Janueri 27.

Sandra Baldry, Ekting namba tu bos bilong haus sik i bilip olsem ol raskol i bin brukim haus sik long painim mani. "Tasol ol i no stilim wanpela samting bikos mipela i nogat mani insait long haus sik."

Sandra Baldry i tok em i namba wan taim tru ol raskol i bin brukim haus sik. Em i tok, "Mi wok inap 9-pela yia long dispela haus sik na mi no lukim kain birua olsem inap nau."

## Autim Setelmen

Florian Dati i raitim

DIPATMEN BILONG bosim graun long Westen Provins i givim pinis las notis long 10-pela lain setelmen pipel long lusim graun bilong gavman em ol i sindaun long en insait long 14 de tasol.

Eria senia Provinsal Lans Opisa long dipatmen bilong Lans na Sevei, Mista Poweji Madu i go pas long ol wok na toktok bilong rausim ol setelmen pipel husat i brukim lo long sindaun long ol taun bilong Westen Provins olsem Kiunga.

Tasol ol dispela lain husat i kisim ol notis bilong lusim setelmen haus em ol i sanapim long graun bilong gavman tokim *Wantok Niuspep* olsem, "Sapos gavman i luksave olsem mipela i sindaun long graun bilong en, bilong wanem ol opisa bilong gavman i tokaut long mipela long namba wan taim stret, taim mipela i wok long sanapim pos bilong haus?"

Klostu olgeta dispela 10-pela papa bilong ol haus i sanap long graun bilong gavman i tok, "Mipela bin spenim bikipela mani na hatwok tru long mekim ol haus. Mipela i kamapim wara saplai na gaden na ol kain samting olsem pinis long dispela graun. Olsem na gavman i no inap long rausim mipela no givim kompesesen long mipela long olgeta dispela hatwok."

Tasol man husat i go pas long givimaut ol dispela notis bilong klia long graun bilong gavman, Mista Madu i tokim wantok olsem. "Lo bilong gavman bilong PNG i tok klia tru olsem no gat manmeri i ken sindaun nating long graun bilong gavman."

Mista Madu i tok, wok bilong rausim ol setelmen manmeri long graun bilong gavman i gutpela tu bikos ol pipel bilong Kiunga taun, taun

kaunsil, na ol pipel bilong viles klostu long taun. Planti man i komplon olsem dispela ol skwata setelmen i stap long graun bilong gavman na i no stret. Narapela komplon i tok olsem planti raskol i save hait na stap long ol dispela setelmen na bagarapim lo na oda long taun.

Mista Madu i tok olsem, planti lain olsem, Eria Kodineta, deputi bilong em, Provinsal Plis Komanda na ol pipel bilong Kiunga Taun yet.

Deputi Eria Kodineta bilong Not Flai Eria, Mista Dominic Tari i tokaut olsem em i givim olgeta sapos long Mista Madu na dipatmen bilong Lans long Westen Provins long klinim ol skwata setelmen na rausim ol manmeri i go bek long viles na provins bilong ol.

Mista Madu i tok olsem planti taim ol opisa bilong lans i save tokim ol setelmen pipel isi tasol long lusim graun bilong gavman. "Tasol ol i pasim yau long mipela."

Em i tok, namba tu bikipela samting ol man i mas harim em long taim ol i kisim notis pepa long gavman i tokaut long ol i mas lusim ol setelmen long graun bilong gavman na go bek long ples bilong ol. Dispela notis i givim 14 de tasol long pasim kago na wokabaut.

Las wok bilong rausim ol setelmen pipel long graun bilong gavman sapos ol i no harim namba wan na namba tu singaut, Mista Madu i tok, em long kisim ol i go long kot. "Las samting i stap em long kotim ol long sakim tok bilong gavman."

Mista Madu i redi long kisim ol dispela setelmen pipel i go long kot sapos ol i sakim toktok i stap insait long notis pepa na sindaun yet long setelmen haus bilong ol.

Planti bilong ol famili husat i sindaun long graun bilong Westen Provinsal Gavman em ol pipel bilong Westen Provins yet. Tasol i gat wan wan famili bilong ol arapela provins i sindaun namel long ol tu, Mista Madu i tokim *Wantok*.

## Stail ain 'hos' ya!



• Liklik Ekonia Ibana i wok long hatim tru long pilai long hap ain 'hos' bilong em i stap long Boroko Sofbal graun long taim *Wantok* ripota Alfred Kaniniba i painim em na kisim dispela poto.

## Rasia i autim ol PNG studen

OL STUDEN bilong Papua Niugini husat i painim bikipela hevi long Rasia bikos ol i egensim ol bos bilong yunivesiti bai kamap long PNG long Fraide 31 Janueri.

Gavman bilong Papua Niugini i bin salim pinis K11 tausen long baim rot bilong 4-pela studen bilong PNG husat i stadi long Rasia, tasol nau opis bilong Paim Minista i no inap tok stret sapos olgeta o tupela studen tasol bai kam bek.

Opis bilong Paim Minista long Waigani i tok olsem wanpela

teleks i kam long Moski, biktaun bilong Rasia i tok olsem ol dispela studen husat i kraik long kam bek long PNG i lusim pinis Mosko na bai kamap long Australia long Fraide.

Ol dispela studen, em, Bruce Gigmai, Joseph Yomba, Burtford Maiago na Emmanuel Melpa. Tasol tupela studen husat i strong tru long kam bek em Bruce na Burtford, bikos tupela i go pas long toktok na pait egensim ol bos bilong yunivesiti ol i stap long en.

Man husat i bin

bungim ol studen long yunivesiti bilong ol long Rasia long Trinde las wik, i gat narapela kain stori bilong ol dispela studen.

Ben Micah, Jeneral seketeri bilong PNG Nesenel Yunian ov Studen (PNGUS) i tok, "tupela studen tasol i tok long kam. Ol dispela studen em Bruce na Burtford."

Micha, husat i bin go long kibung bilong Intenesel Yunian ov Studen (UPNG i wanpela memba) long Korea i bin bungim ol dispela studen long Mosko long raun bilong em i kam bek,

em i tok.

Em i tok olsem ol tupela studen ya (Bruce na Burtford) i no laik sampela kain sevis em Yunivesiti bilong 'Peoples' Friendship' na 'Mosko State' yunivesiti i givim ol.

Ol studen i painim hat tru long stadi bikos ol i no laik stadi long lo bilong Rasia olsem yunivesiti bilong ol i laik ol mas stadim. Ol i tok olsem ol i no kisim sans long stadi long samting ol i go long stadi, Ben Micah i tok.

Em i tok olsem gavman bilong Rasia i givim mani tu long

salim dispela tupela studen i kam bek long PNG. Em i tok olsem, ol bos bilong dispela tupela yunivesiti i askim ol studen long lusim pilai politik na skul, tasol dispela tingting i no inap stopim Bruce na Burtford long kam bek.

Opis bilong Paim Minista i no amamas tru long dispela tupela studen husat i bin givim hatpela taim long ol ovasis PNG opisa, na tu long ol opisa bilong Australia long Mosko.

Wanpela senia opisa

I go moa long pes 5

TOK SAVE



ROT BILONG I KAM INSAIT LONG PTC 4 MILE

Stat long 10 Februeri, 1986 ol wokman na ka i karim kago bilong PTC tasol bai i ken kam insait long rot klostu long Kapentas/Niugini Motos long 4 Mile.

Ol arapela man husat i laik kam insait long PTC long 4 mile i mas kam long rot i stap long Waigani Draiv.

D. KAMARA  
MANAGING DIRECTOR

DJA/VGG



Bai ol i go we?

NESENEL Gavman bai mekim wanem long helpim dispela 24,231 studen husat i popaia long haiskul long dispela yia?

Bai gat 4,000 Gret 6 skul liva i go long vokesenel senta na arapela trening skul. Na dispela arapela 20,000 poroman bilong ol go we? Sampela skul liva bai gat mani long mekim COES kos o joinim yut projek nabaut long olgeta hap bilong kantri.

Tasol ol papamama i no inap amamas. Long wanem ol i hatwok long putim pikinini long skul. Na ol i wet long lukim pikinini i pinisim skul, painim wok na bekim dispela hatwok bilong ol.

Dispela tingting i pretim planti yangpela manmeri long go bek long asples. Orait. Gavman bai mekim wanem long helpim ol insait long taun eria o long pulim ol i go bek long asples?

Gavman i gat gutpela bekim o nogat? Ol sios i gat rot bilong helpim ol dispela skul liva i painim amamas o nogat? Inap helpim bilong sios na gavman i tambuim ol dispela skul liva long bihainim rot nogut o olsem wanem?

# Is Sepik rausim moa Malaria sevis wokman

PLANTI LAIN ol wokman bilong Malaria seksen insait long Helt Divisen bilong Is Sepik i wet nau long gavman i tok save long ol sapos ol bai gat wok yet o nogat.

Ekting Asisten seketeri bilong Helt long Is Sepik Mista Sari Wimban i tok olsem 43 bilong ol wokman insait long Malaria seksen i stap long dispela lista. Na ol i salim pinis nem bilong ol i go long hetkota bilong Helt Dipatmen long Mosbi. Olgeta dispela 43 wokman em ol pemenen pablik sevan bilong gavman.

Namel long ol dispela lain wokman em 9-pela Malaria Ekstensen Opisa na 34 Malaria Ek-

stensen Asisten. I gat 48 wokman bilong Malaria seksen insait long divisen bilong helt long Is Sepik Provins.

Provinsal Malaria supavaisa long Is Sepik Mista Gabriel Kaivi i tok olsem em na 5-pela arapela wokman bilong Malaria seksen bilong Is Sepik bai stap yet long wok bilong ol. Ol i tingting tu long putim sampela bilong ol dispela wokman i go wok insait long sampela arapela divisen insait long Helt Dipatmen.

Long las yia Helt Divisen long Is Sepik Provins i bin rausim 60 leba bilong Malaria seksen insait long provins. I bin gat 45 leba long taim ol i bin rausim ol dispela lain.



• Wanpela wokman bilong Malaria seksen long Is Sepik i skelim marasin i go insait long pam bilong em. Ol i go raun long ol ples insait long Maprik distrik.

**WANTOK NIUSPEPA**

Nius i kamap 52 taim long yia

Opis bilong Edita na edvetaising long PNG

P.O. Box 1982, Boroko  
Telepon: Mosbi - 25 2500,  
Teleks: NE 22213  
Edvetaising - Telepon: 25 2500

**PE BILONG WANPELA YIA, 52 NIUSPEPA**

Ples	Air Surface
Port Moresby	K20 K20
PNG	K29 K29
Australia & Sol Islan	K60 K39
New Zeland & Pacific	K78 K46
America & Europe	K118 K60

Printed and published by Rowan Sidney Callick, of Purari Avenue, Gabutu, at Allotment 2, Section 209, Hohola.

## Minista hatim bos bilong edukesen

MINISTA bilong Edukesen, Mista Aruru Matiabe i bin givim oda long Seketeri bilong Edukesen, Mista Geno Roakeina na ol wokman bilong em long "Pasim maus bilong ol."

Mista Matiabe i mekim dispela strongpela toktok bihain long planti hevi i kamap long plen bilong gavman i givim hap mani long baim skul fi bilong ol studen long kantri. Dispela plen i no ran gut na i no kamap long taim ol i bin makim long en.

Mista Roakeina i kisim dispela hatpela

tok i kam long Minista bilong em bihain long em i bin toktok long niuspepa olsem em i wari long gavman na Edukesen Dipatmen i wok isi tumas long baim subsidi o hap pe bilong ol skul studen long skul fi.

"Gavman i no tok tok yet long 1986 baset.

Olsem na em i no stret long ol pablik sevan i toktok long kamapim bikpela hevi long ol manmeri olsem skul fi." Dispela em bikpela hevi bilong politik, Mista Matiabe i tok,

i go moa long pes 5

I GAT bikpela komplek i kamap long dispela wik long tambuim wok bilong opim bikpela welpam bisnis long Noten Provins.

Oro Provinsal Gavman i no amamas long Higaturu Welpam kampani long Popondetta, Noten Provins. Long wanem, ol i tok dispela welpam bisnis i no bringim profitmani i go long lokal pipel na provinsal gavman. Na provinsal gavman i singautim Nesenel Gavman long tambuim wok bilong opim dispela welpam industri i go bikpela moa.

Primia bilong Oro gavman, Mista Dennis Kageni i autim belhevi long dispela wik Trinde olsem dispela bikpela welpam projek i bilong Nesenel Gavman. Na ol pipel wantaim provinsal gavman i no kisim wanpela gutpela helpim long en.

Mista Kageni i tok, wokmani bilong dispela welpam industri i go long han bilong Nesenel Gavman wantaim Komonwelt Developmen Kopresen (CDC). Dispela rot i

no stret. Long wanem gavman i mas luksave olsem dispela bisnis i stap long graun bilong Noten Provins. Na ol i mas stiaim bikpela sevis o helpim long gavman na pipel bilong dispela graun.

Em i tok olsem gavman bilong em i welkamim ol kampani na bisnis long go insait long kirapim ol projek o wok bisnis. Tasol dispela gavman i laikim ol pipel bilong en i kisim bikpela helpim moa long ol dispela wok bisnis. Sapos dispela rot i no kamap, em bai provinsal gavman i sanap makim pipel na tambuim kirap bilong olgeta kain wok senis long provins.

Em i tok gavman bilong em bai go het long paitim toktok wantaim Higaturu Welpam kampani long dispela komplek bilong graun. Na ol bai tambuim kampani long opim bisnis bilong en. Long wanem ol i no laikim dispela pasin bilong ol kampani, wok projek o industri i lusim tingting long pipel long bihaintaim.

Nesenel Gavman i gat 50 pesen sea insait

long dispela welpam projek, na Komonwelt Developmen Kopresen i holim narapela 50 pesen sea. Na dispela projek aninit long Higaturu Welpam kampani i kirapim 400 hekta gran klostu long Popondetta taun.

Primia Kageni i tok, "Gavman bilong mi i no gat sea insait long Higaturu Welpam kampani. Olsem na gavman bilong mi wantaim pipel i no inap larim wok bilong opim eria bilong projek. Long wanem, Nesenel


Gavman na CDC i amamas long kisim bek profitmani long ol welpam em Higaturu kampani i save salim long ovasis. Na ol i no wari long rot bilong helpim pipel bilong dispela graun we bisnis i stap long en."



• Wanpela famili long welpam blok bilong ol long Noten Provins.



# Ol refuji long Westen Provins i amamas long nupela polisi



• Minister Matiabe

**I kam long pes 4**

Mista Matiabe i tok olsem gavman i save long dispela hevi bilong planti manmeri husat i no gat inap mani long helpim ol pikinini bilong ol i go long skul. Olsem na em yet bai kamapim dispela hevi kwiktaim long kabinet kibung. Em i tok, "Dispela gavman nau em i gavman bilong ol pipel." Na olsem bai gavman i no inap long tromoi nating hevi em ol pipel i pilim nau. Gavman bai traim long

givism olgeta helpim em i ken long ol pipel bilong Papua Niugini. Tasol Mista Matiabe i tok, em bai redim liklik mani bilong helpim ol mamapapa huat i painim hat long baim skul fi bilong pikinini. Bai gat sampela mani bilong dispela wok long 1986, em i tok. Tasol em i no bin kamapim hamas mani em laik holim bilong helpim ol mamapapa baim skul fi bilong pikinini bilong ol.

**i kam long pes 3**

long opis bilong Praim Minista i tok, "Ol opisa bilong Australia long embasi bilong ol long Mosko i belhat na les pinis long salim toktok na traim long helpim ol dispela PNG studen husat i laik kam bek. "Mipela i bilip olsem ol dispela studen i sik na les pinis long stap long Rasia na laik kam bek long PNG, em tasol," wanpela opisa i tok.



• Ben Micah — jeneral seketeri bilong PNGNUS

OL REFUJI insait long Westen Provins i amamas tru long stap bek long Papua Niugini, tasol ol i no amamas long lusim kem bilong ol na go sindaun wantaim ol arapela refuji long wanpela provins tasol.

Ol hetman bilong ol kem na lida bilong refuji i mekim dispela toktok bihain long Praim Minista Wingti i kamapim foren polisi bilong ol refuji long tupela wok i go pinis.

Kaunsila bilong Komopkin Refuji Kem, Philipus Apai wantaim 8-pela arapela bikman bilong kem i amamas na tenkim Praim Minista Wingti long kamapim dispela lo bilong helpim refuji. Ol i amamas olsem gavman bilong Wingti i stretim dispela wari long tripela mun tasol na Somare i bin westim moa long wanpela yia long stretim hevi bilong ol refuji.

Ol refuji long Rum-ginae i tok welkam long sapot em loya Mista Bernard Narokobi i givim long ol na pikinini bilong ol.

Mista Narokobi i bin singaut long gavman bilong Mista Wingti long givim skul ol larim ol pikinini bilong ol refuji long go skul. I gat 10-pela tisa i stap namel long ol refuji husat inap tising ol pikinini refuji long pasin na tokples bilong ol yet.

Mausman bilong ol refuji long Yogi Kem long Westen Provins, Mista Julius Kaan i tok, "Sapos PNG Gavman i no larim ol pikinini bilong refuji i



go skul wantaim ol arapela PNG manki, orait, ol lida i mas helpim 10-pela refuji tisa long skulim ol refuji pikinini long ol kain samting ol i save lainim long Wes Irian."

Mista Kaan i tok, "Ol papamama bilong ol pikinini long ol kem i save tokaut long bikpela hevi bilong ol long pikinini i no go long skul. Ol manki refuji i no go yet long skul taim ol i bin kam insait long

PNG long tupela yia i go pinis. Mista Kaan i tok olsem, ol refuji long Westen Provins i amamas long stap yet long Westen Provins sapos PNG Gavman i orait long ol i stap. Em i

tok, bikpela wari bilong ol long lusim Westen Provins em olsem. Ol i pret, nogut bai ol pipel bilong arapela provins ol i go long sindaun long en bai mekim nogut long ol.

## Moa pipel i sapotim tingting bilong gavman

JOEL MAIMBAN i wanpela wokman bilong Nesenel Providen Fan long Mosbi. Em i tok olsem em i no sapotim gavman long wanem dispela hevi em i bilong Papua Niugini na gavman bilong Indonesia. Na watpo givim i go long Yunaitet Nesens long wanem bipo ol i bin rongim wok long taim Belanda i lukautim Wes Irian.

JOE GERAWA i bilong Milen Be Provins. Em i tok i gutpela gavman i tok



• Jacob Bando

klia na i bin autim stret tok long tingting bilong em nau long dispela hevi bilong ol lain refuji.

"Long taim bilong olpela gavman, planti bilong yumi i no save olsem i bin gat polisi bilong boda o nogat. Na ol i wok long paulim tok na mekim ol kain kain hait tok nabaut.

"Tasol nau i gutpela olsem gavman bilong Wingti i mekim klia olsem ol i sanap bilong ol long dispela problem bilong-boda.

JOE HILARI husat i wanpela studen na em i stap long Sabama. Em i tok olsem i gutpela

Gavman i tokaut pinis long nupela polisi bilong em long sindaun bilong ol Wes Irian refuji insait long PNG. Yunaitet Nesen bai lukautim ol dispela lain pipel nau na painim narapela kantri we ol i ken go sindaun long en.

Wantok i askim sampela ol pipel long Mosbi long tingting bilong ol nau long dispela samting.

olsem Papua Niugini refuji. gavman i askim Yunaitet Nesen komiti bilong refuji long kam na helpim ol refuji long wanem i luk olsem dispela hevi i bikpela tumas na Papua Niugini wanpela i no inap long stretim hariap.

ISA MAI husat i bilong Galp Provins i tok olsem em i amamas gavman i askim Yunaitet Nesen long helpim.

Em i tok, "Sapos yumi yet i traim long stretim dispela hevi bilong ol refuji bai i hat liklik na dispela kain pasin bai inap kamapim birua namel long PNG na Indonesia."

JACOB BANDO i bilong Ramu long Madang Provins. Em i tok olsem nau em i rait taim bilong gavman i tokaut olsem Yunaitet Nesens bai kam long Papua Niugini long helpim Irian Jaya

Em i tok, "Somare gavman i no bin mekim wanpela kain polisi bilong helpim ol refuji na ol i giaman tasol long toktok.

"I gutpela olsem gavman bilong Mista Wingti i kirap na mekim strongpela polisi bilong helpim ol Melanesian brata bilong yumi.

"Mi sapotim gavman bilong wanem ol i mekim raitpela rot bilong givim gutpela sindaun bilong ol refuji."



• Joel Maimban



## Bisop yu no sori?

Dia Edita — Mi sem tru long ritim nius bilong Bisop John Etheridge bilong Vanimo i askim long kisim K10,000 kompensesen pe. Dispela nius i kamap long *Wantok Niuspepa* Namba 594 long Novemba, las yia. Bisop Etheridge i kotim Seketeri bilong Wes Sepik Provinsal Gavman. Mista Leo Saulep long bagarapim nem bilong em nating.

Mi wanpela memba bilong Katolik sios. Tasol mi gat sampela askim long Bisop.

Yu save skulim mipela long karim diwai kros bilong Jisas na bihainim pasin bilong em. Na yu tok long mipela i mas givim bel long arapela pipel husat i birua o mekim pasin nogut long mipela.

Bisop, olsem wanem na yu no laik marimari long Leo Saulep na pogivim em? Watpo na yu laik kisim dispela K10,000 olsem kompensesen? Bilong wanem as tu na yu laik kotim narapela brata bilong yu long ai bilong Bikpela Jas?

I gat planti toktok long Baibel i soim mipela ol Kristen manmeri long lusim sin bilong narapela man o meri o brata husat i mekim rong long mipela. Sapos Saulep i

bagarapim nem bilong yu, Bisop, orait yu mas belisi na lusim pekato bilong em.

Long taim soldia bilong Roman ami i tok pilai na bagarapim nem bilong bikpela king bilong yumi, Jisas Kraus, em i no bekim rong ol i mekim. Ol i givim pen long Em na nilim Em antap long diwai kros.

Mipela ol grasrut pipel bilong Katolik Sios insait long Enga Provins bai sem pipia tru, sapos yu Bisop i no lusim pekato bilong Saulep. Mipela i tingting long spirit bilong mipela. Mipela i no wari long biknem bilong Sios. Em i tru olsem mipela ol Kristen manmeri i mas pait long rait bilong mipela insait long graun bilong mipela. Tasol i no long dispela rot bilong askim long pe.

Maski long saveman i kam long ovasis na paulim mipela gut tru na haitim tok tru bilong God. Maski long skulim mipela long rabis lo bilong Roman Katolik Sios na nogat gutpela kaikai bilong en. Sapos mipela i paul nabaut, bai mipela i mekim wanem?

**Karolus Arokome,  
Pakiru Katolik Misin  
Laiagam, Enga Provins.**

## NHC haus i "bokis masis"

Dia Edita — Mi gat wari long ol haus bilong Hausing Komis i stap long Morata namba tu long Mosbi.

Dispela ol haus i liklik nogut tru olsem bokis masis. Kain haus olsem i no haus bilong putim 3-pela rum bilong slip. Liklik hap spes tru bilong sindaun na liklk spes bilong

haus kuk. Klostu stret long haus kuk, em toilet i stap.

Sapos yu sindaun long rum sindaun na husat i go insait long toilet, em bai yu ken smelim pekpek. Na harim pispis i pairap tu.

Dispela kain haus i ken bringim sik long ol famili we i gat 5-pela o

### Ples no gat buai

Dia Edita — Mi laik sapotim tok bilong brata ya Joe W.B. long *Wantok Niuspepa* namba 585.

Mi tu bilong Simbu Provins na ples bilong mi Mul-Soikowan tasol mi stap long Rabaul. Yes brata mi save sem nogut tru taim mi harim ol buai growa i tok hailans manmeri i no gat buai long ples bilong ol.

Ol i save kam long

nambis olsem Lae na baim buai na ol salim gen long sem maket o provins.

Mobeta ol manmeri i save baim na salim buai mas karim i go long provins o ples bilong ol yet na salim buai bilong ol.

Traim lusim buai na wokim kopi gaden long ples.

Mi les long harim dispela tok nau.

**K. Kak, Rabaul.**

## Kaikai tasol

Dia Edita — Mi save lukim planti meri Avi na Sepik ol baim buai na daka na kumu long Arawa maket. Na ol i save salim gen long rot. Mi les tru long ol salim gen long rot.

Sapos yumi kam long wok mani orait baim na kaikai tasol. Yupela ting mani em i namba wan samting tru na yupela i saim samting long rot.

Mi no amamas long pasin yupela i mekim. Plis baim long Arawa Maket na kaikai tasol na noken wokim liklik bandel na salim ken.

**Koname Patage,  
Laiagam, Enga  
Provins.**

## Vidio piksa i no dia tumas

Dia Edita — Mi laik bekim pas bilong Belatu Nanang bilong Saraga, 6-Mail, Mosbi. Pas bilong em i kamap long *Wantok Niuspepa* namba 601. Na em i komplem long papa bilong Saraga setelmen i sasim bikpela mani long ol pipel i lukim vidio piksa long banis bilong em.

Yes, Nanang, yu bin tok olsem dispela papa bilong vidio i save kisim 30 toea, 40, 60 na 70 toea long ol papamama na pikinini husat i go long lukim piksa. Na yu tok dispela mani i bikpela tumas. Tasol mi laik tokim yu olsem dispela 70 toea i no bikpela olsem K7 o K70. Na 30 toea, 40 o 60 toea i no bikpela mani.

Brata, mi tokim yu. Inap yu go long Burns Philip" stua na kisim wanpela vidio masin fri tasol o nogat? Sori tumas. Kos bilong dispela vidio masin bai moa long K1,000. Na man i gat dispela masin bai lusim bikpela mani tu long baim vido kaset bilong soim piksa.

Sapos vidio masin o kaset i bagarap, bai yu kisim mani long wanem hap long baim sevis bilong woksap husat i stretim dispela bagarap? Brata, yu save. Em i taim bilong yumi ol PNG pipel nau. Yumi kisim independens pinis na em i taim bilong kirapim bisnis na traime long kisim mani long strong bilong yumi yet. Sapos yu slip nating na komplem long narapela man, bai yu painim mani olsem wanem long baim ol samting bilong yu yet?

Sori Nanang, yu westim taim nating long raitim dispela pas bilong yu?

**Leo Balep,  
Wewak, ESP.**

# Tingim ol pipel na helpim ol

Dia Edita — Mi wanpela wokman bilong gavman bilong Papua Niugini na mi raitim dispela pas long autim tingting bilong mi long ol Nesenal na Provinsal gavman long ol toktok long en.

Klostu olgeta taim mi baim ol niuspepa, oltaim mi lukim o ritim ol toktok bilong sindaun bilong gavman tasol.

Ol i toktok na pait long bagarapim narapela na tu toktok i save sut long wari bilong wanwan.

Long nius i kam long redio, yumi harim toktok bilong bagarapim narapela tasol. Mi les na planti taim mi save pasim redio.

Ol pipel votim ol bikman long helpim ol. Ol i lusim tingting long ol pipel bilong ol na wari tasol long kisim biknem na mani. Nesenal na Provinsal gavman i gat planti bil o het tok long paitim gutpela toktok long en.

Hia em ol sampela kain hevi tru em ol lida mas long toktok long ol.

1) Kamapim wok developmen olsem hariap kamapim faktori bilong mekim mit long Madang.

2) Putim kolta long ol rot olsem Bogia-Madang haiwe.

3) Lukluk long pe bilong ol gavman wokman na sindaun bilong ol na painim rot long helpim ol wokman baim haus na sindaun gut na mekim wok bilong gavman na komyuniti.

4) Kirapim ol komyuniti projek olsem hospital skul spots senta na ol arapela samting.

Taim mi wok long raitim dispela pas mi harim olsem oposisen long nesenal palamen wok nau long sutim planti toktok long Gavman na ol invesmen bilong em. Na taim mi tanim i go long Redio Madang toktok nau i wok long kamap bikpela em oposisen Matau grup long Madang i laik putim vot i no gat bilip long Primia bilong Madang Mista Max Moeder.

Ol dispela kain nius i mekim na

mi longlong tu. Long wanem, ating ol memba bilong gavman i no save tru bilong wanem ol i kamap memba na ol i no save long wok bilong ol yet.

Taim ol dispela man o memba i go bek long lektoret o konstituensi bilong ol bai ol i givim wanem tok long pipel bilong ol.

Ol i ting olsem taim ol i pait long toktok bilong kisim pawa na i go long redio na niuspepa ol i ting olsem ol pipel long lektret na konstituensi bai harim nem bilong ol. Sori tumas ol i bagarapim tasol nem bilong ol dispela bikos mipela i no laik harim yu kisim pawa na nem bilong ol dipela bikos mipela i no laik harim yu kisim pawa na nem mipela laik yu memba mas pait long toktok long bringim developmen i kam long tarangu ol tausian man i votim yu.

Mi pilim olsem dispela em i wari tru bilong mipela. Mi wanpela Katolik tisa na planti yia nau sindaun bilong mipela i no gutpela tumas. Na wok bilong edukesen i no ron gut tumas long ol taun. Ol Katolik skul i no gat subsidi mani bilong helpim ol baim bil bilong wara, pawa na telepon olsem na taim mipela askim BMS ol i tok sori ol gavman skul tasol bai i gat subsidi inap 25 pesen.

Dispela i olsem wanem? Yumi i no moa stap aninit long husat arapela gavman. Yumi mas helpim ol yangpela pikinini bilong yumi, olgeta pikinini.

Dispela i no mandato bilong God na sapos ol gavman i brukim agrimen, bai ol i sin? Nogat tru? Ol man i wokim i mas bruk long skel bilong sindaun long dispela taim. Tru mandato i no inap na nogat wanpela rot yumi i ken brukim long wanem God i wokim gut tumas bikos em i laikim yumi.

**Anton Dagil  
Edukesen  
Madang.**



## Pais i tokaut klia

Dia Edita — Mi laik bekim "The Right to Know" pas bilong Benny Mor Ulul, Melanesian Alaiens Siman long Madang. Pas bilong em i bin kamap long wanpela niuspepa long 22, Julai, 1985. Mi laik tok save long ol pipel bilong Madang olsem, ol toktok Benny Mor Ulul i mekim i no tru.

Mi tok olsem long las Madang Asembli miting, Provinsal Minista Mista Raphael Saulmai, i bin askim asembli olsem, long save long rot em ol memba bilong nesenal palamen i bin tilim Nesenal Developmen Fan, bilong 1985.

Mista Pais i bin tokaut klia i go long asembli olsem, gavman i bin givim wan wan memba K20,000. Dispela i min olsem Madang i kisim skel inap long K140,000 long 7-pela memba bilong em olgeta.

Na wanwan memba i tilim mani i go olsem wanem, em i samting bilong ol long bihainim aplikesen em ol pipel yet i save salim i go long ol memba bilong ol, long kirapim wanem kain projek ol i gat tingting long en.

Pastaim Pais i tok klia olsem, mani ol i save tilim i save go long ol kain grup olsem, lokal gavman kausil, sios, yut, wimens grup. Na wanwan grup i laik kirapim sampela kain projek long komyuniti bilong ol.

Mista Pais i tilimaut pinis skel bilong em, em

gavman i givim long en. Na nau ol pipel bilong Madang i wet i stap long skel bilong siaman bilong MA, Benny Mor Ulul wantaim MA long tilim aut K12 milion i go long olgeta grup na konstituensi.

Em i bihainim promis em MA i bin mekim long las Provinsal Gavman ileksen i bin kamap long 1982.

Madang Provinsal Asembli, em i wankain long ol arapela Provinsal Gavman. Tasol, Madang gavman i save larim ol planti nupela na narapela kain man nabaut i go sindaun harim kibung bilong asembli.

Sapos Benny Ulul i laik stap long Asembli olsem ilektet lida wantaim olgeta pawa bilong MA, ating ol pipel i nogat tras, bilip, long yu long wanem stori bilong yu i tokim pipel bilong Madang olsem.

Lidasip bilong Benny Ulul, i no klia. Ol pipel bilong Madang nau i yusim het bilong ol.

Ol i bilip long kain bel isi na wan bel man olsem, Mista Tom Pais, bikos, em i no kain man bilong spak na hambak o raun, raun man. Ol pipel long Madang i rispektim kain man olsem Mista Pais. Long gutpela kain pasin sindaun bilong em. Na em i gutpela lida tu.

**Pangu Pati,  
Madang.**



# Ol Madang skwata helpim ol plis

MADANG TAUN bai bagarap gen sapos ol pipel insait long Madang i no wok. bung wantaim plis long stapim ol kain kain trabel i wok long kamap long taun.

• David Susame i raitim

sindaun bilong sam-pela setelmen pipel long Madang.

I luk olsem ol planti raskol insait long Madang i wok long ranawe, long ol plis.

Provinsal Plis Komanda bilong Madang Seif Inspekta Aloysius Eviassa i givim bikpela toktok i go long ol manmeri insait long wanpela kibung ol i holim long Sisiak setelmen i no longtaim i go pinis.

Bihain tasol long 8-pela kalabus i bin brukim Beon haus kalabus na ranawe long 18 Janueri, Plis long Madang i bin mekim wanpela spesel ope- resen na sekap long

Olsem na Sief In- spekta Aviaisa i bin askim ol manmeri insait long ol setelmen long wok bung wantaim ol plis na traim holimpas husat bikhet man ol i luksave, na givim i go long han bilong plis.

Sief Inspekta Eviassa i tokaut olsem

asua i stap long ol papamama na wantok bilong ol dispela ol pikinini i save bikhet nabaut long taun.

Ol i save haitim ol pikinini bilong ol na i o save givim gutpela skul long ol na isi tasol givim ol i go long han bilong lo.

Plantu yut, viles na sios lida i bin tokaut strong tru long helpim ol plis long kamapim gutpela sindaun bilong ol manmeri long Ma- dang taun.

Tasol sampela papa- mama i tok ol i gat bikpela wari tru long ol pikinini bilong ol.

Ol papamama i laik helpim ol plis tasol ol plis i no save mekim gutpela pasim taim ol i holimpasim ol man.

Ol i pret long wanem planti taim ol i lukim plis i save bagarapim na paitim nogut ol pikinini husat i save bikhet nabaut long taun. "Dispela pasin i no gutpela," wanpela papa i tok.

Sief Inspekta Eviassa i tok ol ino ken wari long dispela long wanem em bai toktok wantaim ol plisman bilong em. Tasol em i tok ol pipel i mas givim han long ol plis tu.



• Ol pipel bilong Madang taun i bin mekim bikpela protes long mun Oktoba 1984 long lo na oda hevi insait long taun bilong ol.

## Evara i no laik o refuji i go long Wabo



Roy Evara

MEMBA BILONG Kikori insait long Nesenel Palamen, Mista Roy Evara i no laik gavman i putim ol refuji gen long Wabo kem long Galp Provins.

Mista Evara i tok gavman bilong Chan na Wingti i no bin makim wanpela

membra bilong Galp insait long kabinet bilong ol na watpo nau ol i toktok long putim ol lain refuji long Wabo.

Mista Evara i tok olsem ol pipel bilong Galp Provins i laik lukim developmen i kamap long provins bilong ol na ol i no laik

ol politikman i go putim hevi em wok politik i kamapim insait long provins bilong ol.

Em i tok olsem mobeta Wingti na Foren Afeas Minista Legu Vagi i givim graun long ples bilong ol yet long putim ol dispela refuji long en.

## Trabel long taun i slek liklik

LONG TAIM 8- pela man nogut i bin ranawe long Beon Haus Kalabus, Sief Inspekta Eviassa i bin tok save long Plis Komisina, David Tasion long Mosbi.

Komisina i laik salim ol rait skwat i go long madang.

Tasol Provinsal Plis

Komanda bilong Ma- dang i no laik. Em i tok em bai singautim ol rait skwat sapos ol trabel i kamap bikpela gen olsem bipo.

Ol plis long Madang nau i wok long traim hat tru long katim daun ol raskol pasin insait long taun. Na i luk olsem i nogut planti

bikhet pasin i wok long kamap nau.

Tasol i gat wan wan stil pasin i wok long go het yet.

Long Sarere moning 25 Janueri, 1986, ol raskol i bin stilim ol samting long tripela hap olgeta.


Ol i brukim Kapen- tas Supamaketa na

stilim ol samting em kos bilong ol inap olsem K1,000 olgeta.

Narapela tupela ples ol i brukim na stilim ol samting long en em Redska tredstua na Bowman Trading.

Plis i wok long go het yet long painim ol dispela trabelman.

## Strit bris klostu i redi



Wok i go het na klostu bai namba wan trefik bris bilong Mosbi i pinis nau. Dispela bris em ol i wokim long Boroko insait long siti i bilong ol pipel long yusim long kalapim rot. Bipo i no gat kain rot olsem na ol pipel i save painim taim stret long kalapim rot i go long bas stap o long ol stua. Nesenel Kapital Interim Komisin i givim kontrak i go long Fletcher Morobe kampani ya long wokim dispela bris.

Ol pipel bilong Lae siti i yusim pinis wanpela kain bris olsem long kalapim strit na long taim dispela bris long Mosbi i pinis bai em i namba tu kain bris olsem insait long PNG.

## Morobe yut i kisim K50,000

OL YUT long Mo- robe Provins i kisim K50,000 i kam long Minista bilong Yut na Hom Afeas Mista Willard Wemalo.

Mista Wemalo i givim dispela mani i go long Morobe Yut Kaunsil long yusim long ol yut projek em i kamap nau insait long Morobe Provins. Mista Wemalo i tok olsem dispela mani i go long ol yut em i wan- pela strongpela ting- ting gavman i gat nau long helpim ol yut insait long kantri.

Mista Wemalo i tokaut long dispela samting bihain long memba bilong Nawae Mista Timothy Bonga i tok olsem dispela mani i go long ol yut em i bilong winim sapot long taim bilong ileksen long 1987.

Mista Wemalo i tok olsem dispela mani em i hap bilong mani gavman bilong Somare

Mista Wemalo i toktu olsem olpela gayman i bin makim mani bilong ol yut long ilektoret bilong em stret Tewae Siassi olsem na i nogat mani bilong ol i stap insait long K50,000 sek em i bin givim i go long Morobe Yut Kaunsil.



Raun tasol

Malolo long

## PAPUA HOTEL

• Kala TV, Tollet na Shower, Air-con na telepon long olgta rum tu.

• Disko Bar na Nait Klap na Kalkal na Haus Dring.

• Lukim biknem Bulolo Ba

• Liklik pe — Bet na Brekfas

PAPUA HOTEL

(Lessee Suckling Enterprises Pty Ltd)

Telepon: 21 2622 na mekim buking



# Koromba i belhat long

## kampani kisim kontrak leba

SATEN HAILANS Primia, Yaungtine Koromba i tok, bai em i kisim British Niugini Developman kampani i go long kot, sapos dispela kampani i no sainim wanpela tok orait long welfea bilong ol 36 Saten Hailans man, em kampani i bin rikrutim long wok long Raba plantasin long Sentral Provins las wik.

Mista Koromba i tok, em i egensim tru ol pasin bilong bipo long yia 1950 na 1960 ol kampani i go kisim ol pipel bilong Saten Hailans long wok olsem hos i karim kago long ol plantasin i stap long nambis.

Las wik long 20, Janueri, Mista Paul Archer, wanpela kampani Eksekutiv i bin go long Mendi na traim long kisim 80 pipel long i go wok long Doa Raba Plantasin long Sentral Provins.

Tasol, Primia Koromba i stapim ol pipel long kalap long dispela Talair sata balus i go long Mosbi. Mista Koromba i tokim *Wantok* long 29, Janueri, olsem em i no laik tru long ol kampani i yusim ol pipel bilong em long ol kain wok leba. Em i tok dispela kain pasin i mas pinis nau.

Tasol kampani i rikrutim 36 man i kam daun pinis long wok long Doa Plantasin.

Mista Koromba, i tokim Mista Archer olsem, sapos British Niugini Developmen, i no sainim wanpela tok orait wantaim Saten Hailans Provinsal Gavman insait long 3-pela wik bai Primia i kotim kampani.

Primia i putim sampela poin em i laik bai i stap long dispela tok orait.

1. Taim wanpela long ol wokman, o husat Saten Hailans man long plantasin indai, kampani i mas salim bodi i go long ples na maski long tromo i nating i stap long haus sik.

2. Kampani i mas lukautim gut welfea bilong famili. Sapos man indai kampani i mas salim famili wantaim mani na baim balus bilong ol i go bek long ples.

3. I mas i gat gupela pe, maski long pe bilong ol leba man.

4. Taim kontrak bilong ol i pinis long plantasin kampani i

mas baim balus bilong man na famili wantaim i go bek long ples.

5. Taim papamama o famili bilong man indai long ples kampani mas helpim man ya long go long ples long dispela sori taim.

Mista Koromba i laik bai British Niugini Developmen kampani mas glasim ol dispela toktok na sainim tok orait namel long kampani na Saten Hailans Provinsal gavman.

Mista Koromba i tok, bipo yet long taim bilong "Hailans Leba Skim" long 1950 ol Hailans pipel i wok nabaut long planti plantasin long nambis. Na ol i no save go bek long ples moa.

Em i tok ol i wari tumas bikos trabel na raskal pasin i kamap long ol taun long nambis, em planti Hailans pipel husat i bin go i painim wok long ol plantasin i kamapim. Taim bilong ol i pinis ol i no go bek na ol i sindaun nabaut long setelman na winim planti yia.

Jeneral Menesa bilong British Niugini

Developmen kampani long Mosbi, Mista Marmel Stein, i tokim *Wantok* olsem, kampani bilong em i no gat wanpela tok orait long sainim wantaim Gavman bilong primia Koromba.

Mista Stein i tok, oli bihainim lo bilong Leba Dipatmen long rikrutim husat man i laik wok.

Mista Stein, tu i menesa bilong Doa Esteit we raba plantasin i stap long en long Iritano Haiwe. Em i tok, dispela ol pipel yet i laik wok tasol ol i no gat rok long kam long Mosbi olsem kampani i salim balus i go antap.

Mista Stein i tok, "Mipela i bihainim yet lo bilong Leba Dipatmen na stretim wantaim Mendi Leba opis."

Asisten Seketeri, Nesenel Employman Sevis bilong Leba Dipatmen, long Mosbi, Joe Ofoi, i tok, planti ol kampani i mekim kain wok bisnis olsem i gat laisens long rikrutim ol pipel long mekim wok long plantasin.

Ol kampani i save peim gavman K500 long kisim dispela kain laisens. Tasol em i tok em i no klia sapos, Mista Archer i kisim dispela kain laisens bilong British Niugini long rikrutim ol dispela 80 Saten Hailans man.

Provinsal Leba opis long Mendi, Fred Mapat, i tok Mista Archer i no kamap long opis bilong em. Na em i o soim dispela laisens tu long Mista Mapat long soim olsem olgeta rikrut wok i bihainim lo bilong Leba Dipatmen.

Wanpela man long Mendi hust i lukim ol 80 pipel i askim Primia sapos em i stapim ol i kam wok long Mosbi, bai em i givim wok long ol o nogat.


Olsem na 36 man tasol i kam long mosbi long wok wantaim British Niugini Developman kampani.

Presiden bilong Planters Asosiesen, Mista Don Dunbar-Reid i tokim Primia Koromba, mobeta em i kamapim gupela wok developman na projek i ken kirapim tingting bilong ol asples pipel long stap long ples. Na bai ol i no inap tingting long go painim wok long arapela provins.


Mista Dunbar-Reid i tokim *Wantok* olsem,

i go moa long pes 17


# Not 1...




# Not 2...



# Not even 3...



# BUT 4 In a packet



## Double decker SNACK PAK BISCUITS



- Coconut Snack Pak
- Orange Snack Pak
- Chocolate Snack Pak
- Lemon Snack Pak

*Morobeen*  
BISCUITS

## Hagen



## Park Motel

I gat 30 Rum Long Maun Hagen

- Em i no stap longwe long ol stua
- I gat maket i stap klostu
- I gat ples pilai i stap klostu
- I gat satelait televisen
- I gat pikap ka i sambai long ples balus

**Yu Ken Aplai Long Kisim  
Spesel Pe Bilong Yusim  
Motel.**

**MOUNT HAGEN 52 1388**

CABLES. HAPARK.  
P.O. BOX 81, MT. HAGEN  
TELEX: 52056 HGNPARK



# TOYOTA HILUX

I strong na smat moa



Long olgeta hap bilong Papua Niugini, Toyota Hilux i soim olsem em i wanpela strongpela na smatpela ka. I gat kain kain — ol 2WD, 4WD, singel keb, ekstra keb na dabol keb na ol i gat petrol o disel ensin. Kam na lukim mipela na test draivim wanpela Toyota Hilux nau.

**ELA MOTORS TOYOTA**

WHEELS FOR THE NATION

PORT MORESBY 21 7036 ● LAE 42 2322 ● RABAU 92 1988 ● MADANG 82 2188 ● GOROKA 72 1844 ● MT. HAGEN 52 1888 ●  
WEWAK 86 2255 ● POPONDETTA 29 7240 ● KAVIENG 94 2132 ● KIETA 95 6083 ● KIMBE 93 5155 ● TABUBIL 58 9060

A MEMBER OF THE BURNS PHILP GROUP



# Ol pipel bilong Kiunga i no inap groim kakau

WANPELA GAVMAN dipatmen i daunim pinis bikpela laik bilong ol pipel bilong Rumginae, long Kiunga Distrik, Westen Provins long kamapim bikpela bisnis kakau long dispela yia.

Dipatmen bilong Praimeri Industri (DPI) i no gat opis bilong ol i wok long Kiunga (Not Flai Eria) na i no gat DPI opisa i gat inap taim long mekim stadi long dispela tingting bilong ol pipel long kirapim kakau pinis.

Narapela bikpela hevi bilong DPI long no inap lukluk long kakau bisnis long Not Flai Eria, Westen Provins, em bikos dispela dipatmen i no gat mani bilong mekim wok stadi.

Eria Rural Development Opisa husat i save lukautim Not Flai Eria, Mista Marava Piku i tokim ol pipel bilong Rumginae long ol dispela hevi bilong DPI. Ol pipel i laik save sapos DPI inap helpim ol long dispela

nupela tingting bilong kirapim kakau bisnis.

Mista Piku i tok, DPI i no gat opisa long Kiunga husat i save long wok bilong groim na redim kakau long salim. "Sapos i no gat ol kain opisa olsem bai ol bikpela wok bisnis i no kamap gut bikos i no gat man bilong mekim wok stadi."

Mista Piku i tok, ol pipel bilong Kiunga i painim wankain hevi tu long timba bikos i no gat saveman bilong DPI i wok long Kiunga. Tasol Kiunga i pulap tru long kain kain diwai bilong timba.

Em i tok olsem DPI i sot tu long mani na kain bikpela bisnis olsem kakau bai no inap karim kaikai gut sapos ol pipel i go het na planim kakau long laik bilong ol yet.

Mista Piku i tok, long ol arapela provins long PNG na tu long planti kantri long wol, wok egrikalsa em i bikpela samting na Dipatmen bilong DPI i save kisim bikpela mani tru long ranim

## groim kakau

*Tupela wik i go pinis ol pipel bilong Rumginae long Kiunga, Westen Provins i tokaut olsem ol laik planim kaukau long mekim bisnis. Long dispela taim, Mista Narokobi (Bernard) i givim toktok bilong em tu long wok bisnis na askim ol pipel long wok bung wantaim DPI. Tasol nau DPI i no inap long helpim long ol pipel.*

*Lukim stori i kam long Spesel Ripota, Ian Kakarere long Kiunga.*

gut wok bilong ol. Tasol long Westen Provins, Not Flai Politikal Etwaisari komiti i givim DPI opis 11 pesen tasol bilong 1986 baset mani.

Mista i tok, DPI long Not Flai eria i brukim mani long ol projek we ol opisa bilong ol i wok longen, na tu long wanem projek nau i save bringim bikpela mani i kam insait long provins.

Mista Piku i tok olsem Not Flai Eria i brukim mani bilong DPI long dispela rot st long bikpela projek tru i kam daun long liklik. Ol dispela projek em:

Raba, gaden kaikai projek, wok bilong lukautim enimal na binatang, wok bilong enimal fam, olsem kakaruk projek, lombo bisnis, pis bisnis, wok bilong ol staf na manesmen, kakau na kopra na las tru em forestri.

Em i tok em i save long wanpela growa long Ningerum, Westen Provins yet, husat i gat 19 kakau diwai i save karim kaikai tasol DPI i no inap long helpim dispela man long salim kakau bilong em long bikpela maket.

Mista Piku i tok tu olsem ol pipel bilong Westen Provins na Wes Sepik, (tupela provins long boda - PNG Indonesia) i no inap long planim kopi na mekim bisnis long kopi.

Em i tok, DPI long PNG i tambu long dispela bikos ol i no laik long bringim sik nogut bilong kopi, em i stap pinis nau long Indonesia, i kam insait na bagarapim kopi bisnis long PNG.


Mista Piku i tok tu olsem, DPI long Westen Provins i givim bikpela sapot bilong ol long raba bisnis. Olsem na long dispela yia moa mani i go long raba bisnis.

Long namba tu wik bilong Janueri 1986, Mista Piku i tok, ol growa i kamapim 100 ton "Wet Kap Lamp" (raba long kap). Em i tok, long 1985 ol growa

i kamapim tasol 332 ton long 12-pela mun olgeta.

DPI opis long Westen Provins bai helpim ol growa long planim narapela 200 hekta raba diwai long dispela yia. I gat pinis 680 hekta bilong ol bikpela raba diwai nau insait long Kiunga Distrik tasol.

Ol pipel bilong Kiunga i no mekim bisnis yet long kisim raba long ol dispela diwai, bikos ol DPI i painim hevi long mani long helpim ol growa long pulim raba long ol dispela diwai.



• Ol pipel long planti ples insait long PNG i statim pinis ol kau projek bilong ol.



• Ol pipel bilong ples Osima i amamas long lukim dispela banis kau.

### The Coffee Market

Sponsored by:

**CIL** COFFEE INTERNATIONAL  
 PHONE 721322 | P.O.BOX 111  
 TELEX 72663 | GOROKA  
 FAX 722180 | PAPUA NEW GUINEA

#### Wik stat long: 20-1-86


Pe bilong grin bin kopi long ol stua long Lae na long ol dua bilong faktori.

Dispela mak bilong pe i kam long ol kopi kampani. Ol mak bilong pe i bilong wanwan senta insait long PNG.

Gret	Mak bilong Pe
Y	K3.50 inap K3.80
X	K3.67 inap K3.85
A	K3.73 inap K3.91
Robusta	K0.00 inap K2.30

#### Pe bilong old drai kopi bin long dua bilong faktori:

Kainantu	No Quotes - No Quotes
Goroka	K2.10 - K2.31
Kundiawa	K0.00 - K0.00
Minj/Banz	K2.51 - K2.60
Maun Hagen	K2.51 - K2.60
Mendi	K2.31 - K2.40
Wapenamanda	K0.00 - K1.30
Lae Arabic	K1.85 - K2.00
Robusta	K1.50 - K1.60
Wewak Robusta	K1.00 - K1.10
Madang Arabic	K0.00 - K1.60
Robusta	K0.00 - K1.30



continental trading co. pty. ltd.  
 po box 7077 boroko. ph. 252200



# Ramu suga i go long ol skul

OL SKUL insait long PNG i gat wanpela liklik buk nau em ol i ken yusim long lainim moa long pasin bilong planim suga na rot ol faktori i yusim long wokim suga.

Ramu Suga kampani i salim 15,000 (15 tausen) ol dispela buk i go long ol skul bikos ol i tok olsem planti taim ol skul pikinini i save salim pas i go long kampani na askim long kain tok save olsem.

Dispela liklik buk i gat 27 pes long en na Ramu Suga kampani i bin wok wantaim Edukesen Dipatmen long stretim. Wanpela meri Kate Halstead i bin raitim stori i stap insait long dispela liklik buk.

Dispela buk long tok Inglis em i isi long ritim na i gat ol piksa na doring i stap insait long en em ol skul studen bilong PNG bai painim isi long ritim na kisim save long en.

I gat piksa bilong Mista Kane em ol pipel bilong PNG i save gut tru long em. Na ol stori insait long buk i stat long suga hia long PNG na long ol arapela kantri long wol, olsem wanem ol i planim suga long Gusap na olsem wanem ol i wokim suga em yumi save dring wantaim ti na kopi.

Ramu Suga i bin stat long 1979. Na gavman bilong PNG i gat 49 pesen sea long en, Komonwelt Developmen Kopresen i gat 25 pesen sea na 13 pesen bilong ol sea em sampela grup insait long PNG i holim. Na arapela 13 pesen i stap long ol ovasis kampani.



• Christopher Gorea na Ben Saret is indaun lukluk long dispela liklik buk em Ramu Suga i salim i go long ol skul insait long PNG nau.



## Yut bilong Japan i kam lukim PNG

MOA LONG 500 yut bilong Japan bai i kam mekim sotpela lukluk raun long Mosbi long Mande Februari 3. Dispela liklik raun em ol i kolim Japanese Goodwill Tour.

Mausman bilong embasi bilong Japan long Mosbi Mista Kenji Takeshita i bin tok olsem dispela liklik raun bilong ol dispela yut bilong Japan i bilong train na lainim na tu lukim wanem kain samting o pasin i save kamap long ol arapela hap insait long Saut Isesia na tu insait long Saut Wes Pasifik.

Mista Takeshita i bin tok dispela em i namba tu taim bilong dispela sip Nippon Maru long kam long Mosbi. Tasol em i namba 19 taim bilong dispela sip long mekim dispela kain raun long ol arapela kantri.

Mista Takeshita i bin tok olsem dispela projek o aidia i bin stat long 1967 na i wok long ron yet.

Insait long dispela

gutwil tua i gat 6-pela yut bilong Papua Niugini i stap long dispela sip. Em ol 4-pela man na tupela meri. Dipatment bilong Hom Afeas na Yut i bin makim ol dispela yut long go long dispela tua.

Ol dispela yut i bin stap tupela wik long Japan aninit long dispela program em opis bilong Praim Minista bilong Japan i go pas long en. Ol dispela yut i bin stap wantaim sampela famili long Japan na tu ol i bin go lukluk raun long Japan na bungim ol arapela yut.

Insait long dispela tua i gat 54 ol yut bilong ol arapela kantri. Na 10-pela bilong ol i bilong ol kantri long Saut Pasifik. Dispela sip bai i stap long Mosbi inap wan na hap de olgeta na long dispela taim bai i gat bikipela pilai na tu singsing bai i kamap bilong soim ol dispela yut stail na pasin bilong Papua Niugini.

Moa long 200 bilong ol dispela yut bilong

Japan bai i planim moa long 100 diwai long Konstitusen pak klostu long Palamen Haus long Mosbi.

Nesenel Kapital Interim Komisin (NCDIC) i bin kamapim dispela projek bilong planim ol dispela diwai. Ol dispela diwai bai i bilong Papua Niugini yet.

Ol dispela yut bai i go long lukim wanpela ples Porebada ausait long Mosbi long lukim kain pasin na sindaun bilong Papua Niugini.

Wanpela sinia opisa bilong Yut opis long Mosbi Mista John Sania i bin tok olsem em i amamas long dispela program long wanem em i tok ol dispela program olsem bai inap long helpim ol yangpela manmeri long tingting bilong ol na tu i helpim ol long taim ol i go bek long provins bilong ol. Ol inap long givim gutpela helpim na tu bai ol i givim gutpela helpim i go long wok bilong kamapim strong yut insait long Papua Niugini.



# NEW GUINEA MOTORS

## USED VEHICLES



STOCK NO.	MODEL	COMMENTS	VALUE
-----------	-------	----------	-------

### PORT MORESBY

UVP484	Toyota Dyna Truck	Bargain price	K995
UVP485	Toyota Coaster	Ready for business	K2,995
UVP436	Isuzu KB 4x4 LWB	Reduced price	K3,500
UVP429	Mazda Dump Truck	Ready for work	K3,990
UVP358	Daihatsu Tipper	Bargain price	K3,990
UVP269	Mazda 626 Sedan	Great mover	K3,995
UVP481	Isuzu KB Ute 4x4	Diesel, one of the best	K3,995
UVP281	Isuzu TLD Truck	Very popular	K4,995

### LAE

UVL170	Isuzu TLD	Flat deck, diesel	K2,500
UVL173	Ford Courier	Coffee tray	K3,000
UVL179	Toyota Hiace	15 seater bus	K3,200
UVL100	Isuzu Tipper	2 ton, goes well	K3,600
UVL137	Mazda E3000	Diesel, flat deck	K3,800
UVL93	Suzuki Mini Van	One owner, runs well	K3,800
UVL178	Toyota Land Cruiser	4x4, petrol	K3,900
UVL191	Subaru 4x4	Station wagon, very tidy	K3,900
UVL156	Daihatsu	Diesel, PMV body	K4,000

### GOROKA

UV9-1-6	Mitsubishi L200	Needs work, real goer	K1,400
UV	Mazda 323	Tinted windows	K3,125
UV	Land Cruiser	Good motor, runs well	K3,200
UV9-10-5	Mazda B1600	Good family unit	K3,600
UV14-10-5	Mazda E2000	LWB, ready to buy coffee	K3,750
UV	Datsun 4x4	Diesel, coffee tray	K5,000
UV7-9-5	WFR II	Very good unit	K6,250
UV10-10-5	Dyna	Ready for PMV work	K8,750

### KIETA

UVKT47	Isuzu KBD 26	Ute, good condition	K5,300
UVKT40	Toyota Dyna Truck	Tidy tabletop, good warranty	K7,500
UVKT73	Toyota Hilux 4x4	Ute, coffee tray, new tyres, full rego.	K7,600
UVKT38	Isuzu KT26 UXA	3 ton truck, near new, current rego.	K8,000
UVKT62	Toyota 6000	6 ton truck, nearly new	K14,500



Call in or phone us now!

HRD 6566

PORT MORESBY	LAE	KIETA	RABAU	GOROKA	MT HAGEN	KIMBE	and TABUIL
Don Cook Ph. 25 3644	Norm Kopy Ph. 42 3477	Dough Sherland Ph. 95 6144	Fred Powell Ph. 92 1022	Bob Balenzuela Ph. 72 1644	Bob Hall Ph. 52 1152	Mark Seabrook Ph. 93 5191	Ph. 56 9048




# HONDA®

## YU SAVE, YU KEN BAIM.

### 8 AUT LONG OLGETA 10 LIKLIK JENERETAS LONG PNG EMI HONDA

#### LONG PAIMIM GUT NA STRETYUSIM HONDA WARA PAM.



- LIKLIK TASOL MOA PAWA
- ISI LONG OPERETIM
- LIKLIK MENTENENS
- INAP PULIM WARALONG 50 METAS



#### MEKIM WOK BILONG BURUKIM GIRAUN I ISI YUSIM HONDA TILA

- NOGAT BIRUA
- ISI LONG YUSIM
- EM INO HEVI TASOL I STRONG PELA

**TILA**



#### 10 HP 4 STROKE AUTBOD


EM MOYET

- INO SAVE YUSIM PLANTI BENSIN
- SAVE RON GUT TRU
- IGAT GUTPELA PRAIS LONG BAIM
- INO HEVI EM 35Kg TASOL

#### ENSIN BILONG KAINKAIN WOK

SENSIM OLPELA ENSIN WANTAIM  
WANPELA HONDA


- OL I WOK GUT NA STRONG.
- INO HEVI.
- MO PAWA ..... NOGAT NOIS.



#### JENERETA SET

LONG KISIM PAWA  
OLGETA TAIM .... MAKIM  
HONDA

- LIKLIK NOIS
- I STRONG PELA
- ISI LONG KARIM RAUN
- I KOS LIKLIK LONG RONIM



## NOKEN TINGTING PLANTI BAIM HONDA! EMI NAMBAWAN TRU.

HEB 3101

YU KEN BAIM NA  
SEVESIM LONG

**Steamships - MACHINERY**

PORT MORESBY 25 9066	LAE 43 1253	MADANG 82 3021	RABAU 90 1290	KIETA 95 6246
-------------------------	----------------	-------------------	------------------	------------------

O LONG OL HONDA DILAS  
LONG PAPUA NIUGINI.



## Kot bilong Kuabaal i go yet

**DISTRİK kot mejistret, Mista Karo Vagi bai tokaut long 3-pela sas bilong Mista Leo Kuabaal, CIS Komisina bipo long Fraide 31, Januəri.**

Mista Kuabaal, i tokaut olsem em i rong long draivim ka long taim em i bin spak. Dispela em i namba wan sas.

Narapela 2-pela sas em, Mista Kuabaal, i bin laik mekim pasin we inap mekim ol lain bilong CIS na Plis kamapim pait.

Namba tri sas, Mista Kuabaal i wok long dring i stap insait long ples kaikai bihain long taim bilong pasim ples ya.

Mista Kuabaal i mekim ol dispela rong long taim Stet ov Imejensi i bin i stap long Mosbi las yia.

Loya bilong Mista Kuabaal, Mista Kibi Kara i no tok yes o nogat long tupela arapela sas yet.

Mista Kuabaal i bin wokim ol dispela rong long taim em i wok olsem Komisina bilong CIS. Na bihainim tasol, dispela trabel, namba-tu Praim Minista dispela taim, Pater John Momis i pinisim em long wok bilong em.

# Bikpela birua long Kiunga - Tabubil rot

**WANPELA BIKPELA birua tru bilong 1986, i kamap long Kiunga - Tabubil Haiwe long Westen Provins we wanpela man i dai na 7-pela i go long haus sik.**

Long dispela birua, wanpela Toyota ka i bam wantaim bikpela semi trela trak long 18 Januəri, samting olsem 6 kilomita ausait long Kiunga etministresen senta long Westen Provins.

Pasindia long liklik Toyota ka em Dominic Wokman. Em i gat 20

krismas na em i bilong Bankin Viles. Em i dai long taim ka i bin tromeim em long karanas long rot. Dominic i bin wok wantaim 'Star Earth Moving' Kampani.

Dispela kampani 'Star Earth Moving' em i 100 pesen lokal kampani husat i bin winim wanpela 5-pela yia kontrak long wok long stretim rot namel long Kiunga na Tabubil (haiwe).

Wanpela bilong ol man husat i bin ran long dispela Toyota ka long taim bilong dis-

pela birua, Mista Michael Krusaka i tok, "Mi tenkim God olsem mi stap laip yet." Em i tok em wanpela bilong ol dispela lain husat i bin pundaun long ka long kirap kwik na lukim olsem Mista Wokman i dai na slip long fran long ka.

Provinsal Plis Komanda bilong Kiunga, Seif Inspekta Ludwig Kembu it ok, plis i holim pasim pinis na sasim Rocky Wi long draiv kranki na kamapim dai bilong wanpela man.

Rocky Wiemigat 35

krismas na em i bilong Masul Viles, Kundiawa, long Simbu Provins. Na plis long Kiunga i mekim moa wok painimaut yet long dispela birua, Seif Inspekta Kembu i tok.

Narapela birua long Ningerum, Westen Provins i autim pinis planti blut na klostu kilim wanpela wokman bilong Woks Dipatmen husat i wok long putim wanpela pontun long Ok Tedi Riva.

Tube Oliem, krismas 20 bilong Pahoturi long Daru Distrik, i wok long wanpela



• *Tupela man ya i bin stap insait long birua ya. Tasol ol i no bin kisim bikpela bagarap tumas.*

masin antap long pontun long taim dispel amasin i pairap na kaim lek bilong em.

Sampela pipia ai i katim em tu long han bilong em.

Westen Provins Provinsal Woks

Manesa, Dick Karim i tok olsem Tube Oliem i lusim Rumginae Haus Sik na i go pinis long Mosbi Jeneral Haus Sik long kisim moa marasin long wanpela spesel balus sata long Sarere apinun 18 Januəri.



• *Dispela bikpela semi trela trak i bin bamim Toyota lenkrusa.*



• *Dispela Toyota trak i bin kisim bagarap na wanpela pasindia Dominic Wokman i dai long birua ya.*

## Plen bilong Vogae long lo na oda

**PRIMIA BILONG Wes Nu Briten Provins, Mista Bernard Vogae i tokaut pinis long plen bilong gavman bilong em long helpim wok bilong lukautim lo na oda insait long provins.**

Mista Vogae husat i siaman long Pis na Gut Oda komiti insait long provins bilong em i bin tokaut long dispela plen bihain long komiti ya i bin kibung long Kimbe taun.

Insait long dispela plen bilong ol bai ol plisman i mekim, dispela ol wok.

1. Moa plisman bai wok long Kimbe taun, ol skwata setelmen na ol ples i stap klostu long taun.

2. Ol plisman bai sekap long ol sip i kam sua, sekap long ol ples olsem Setin Be kampani long Buluma, Mosa na ol welpam setelmen long Hoskin.

Ol i sekap long plainm ol man husat i no gat gutpela as long stap long ol dispela ples.

3. Ol plisman bai yusim spesol lo long stapim wanem kain trabel i kamap insait long provins.

4. Toksave long ol pipel long redi long no ken haitim ol trabelman.

5. Spesel kat i soim husat manmeri i kam long Kimbe na wanem as tru ol i kam. Bai ol i holim dispela kat na ol i ken save wanem hap tru ol dispela ausaitman i stap long en.

Primia Vogae i tokaut tu long plen bilong ol long stretim na helpim lo na oda insait long provins long taim bihain. Hia em ol dispela plen.

1. Bai i gat ol lo insait long provins bilong stapim ol trabel.

2. Bai ol i lukluk gen long ol ples we ol i ken putim ol skwata i sindaun long en.

3. Apim pe bilong ol sip.

4. Provinsal gavman bai putim moa mani i go long helpim ol rueleria insait long provins.

Mista Vogae i tok olsem bai em i toktok tu long nesenel gavman long plen bilong gavman long stretim lo na oda insait long PNG.

Na em i tok tu olsem ol Niugini ailan bai wok klostu wantaim long traime stapim ol hevi bilong lo na oda insait long ol provins bilong ol.

Mista Vogae i tokim ol kostal sip i save go sua long ol Niugini Ailan long no ken kisim moa pasindia i go long Kimbe. Em i tok olsem ol dispela sip i karim kago na ol wokman o ol pasindia husat i gat gutpela as long go long Kimbe tasol i ken go sua.

**PROVINSAL memba bilong Mosa konstituensi insait long Wes Nu Briten Provinsal Gavman, Moses Nahia i singaut long gavman bilong Paias Wingti long lukluk long hevi bilong ol welpam growa i stap nau long Wes Nu Briten.**

Mista Nahia i tok ol welpam growa i bin laik gavman i lukluk long ol dispela wari bilong ol.

• We bilong makim pe bilong welpam.

• Mak bilong mani em kampani i rausim long pe bilong ol growa.

• Mak bilong pe bilong ol growa.

• Mak bilong takis mani em gavman i kisim,

• Laik bilong ol pipel long baim sia insait long Nu Briten Pam Oil Developmen progrem.

Mista Nahia i tok dispela singaut bilong em i no nupela samting. Bipo wanpela welpam komiti em Somare gavman i bin makim long 1983 i bin go long Wes Nu Briten long harim wari bilong ol

## Ol welpam growa i krai yet

welpam growa.

Tasol, Mista Nahia i tok dispela ripot oli bin givim long dispela komiti i bin go lus nating na i no gat wanpela samting i kamap.

Nau Mista Nahia i laik bai Praimeri Industri Minista, Iambakey Okuk i lukluk gen long dispela hevi bilong ol na tokaut long wanem samting ol bai mekim.

Em i tok nau dispela hevi i stap yet na planti wari i kamap.

Ol kain sevis olsem helt, hausng, wara na rot i gutpela tumas. Em i tok ol pipel i save peim bikpela mani tumas long skul fi na rent bilong graun i go long gavman.

Mak bilong ol skul fi i stap olsem K240 long wanpela studen long wanpela yia na rent bilong graun i bihainim sais bilong graun.

Mista Nahia i tok ol

opmen Kampani, ol i bin salim 625,000 (siks handret na twenti-faiv tausen) wan dola sia.

Tasol ol welpam growa na ol papa bilong graun i no bin kisim wanpela sia liklik.

Na nau ol pipel i laikim wanpela mausman bilong ol i stap insait long bot ov dairekta bilong dispela kampani.

Mista Nahia i tok em i laik askim Mista Okuk long go lukluk raun long Wes Nu Briten na toktok tu long ol pipel long hap.

tu tausen setla na welpam growa tu i laikim gavman i mas givim ol sia insait long Nu Briten Pam Oil Developmen Kampani.

Nau yet Nesenel gavman i gat 50 pesen sia na wanpela kampani, Harrison na Crossfield i gat narapela 50 pesen sia insait long dispela kampani.

Bipo long 1967, taim gavman i kamapim Nu Briten Pam Oil Divil-



■ **MOA trabel i kamap nau long Madnag. Plis long Madang i painimaut olsem nau i gat planti trabel bilong brukim haus na stil i save kamap long wanpela wik.**

Plis long Madang i ting olsem dispela ol trabel i kamap bikpela bihain long 8-pela kalabus i bin ranawe long Bion Haus Kalabus sampela taim i go pinis.

Plis Komanda bilong Madang Provins i putim pinis moa plisman long patrol long ol strit long nait long traime daunim moa trabel olsem long kamap.





## GUTPELA KAIKAI

### Praim rais

Planti taim yumi save kukim moa rais na i gat planti i stap yet long sospen. Yu ken praim dispela kol rais long moning gen na kaikai. Sapos yu gat frisa i stap orait putim kol rais i stap long frisa na long apinun yu ken praim gen na kaikai.

Hia em wanpela rot bilong praim kol rais.

### Ol samting yu mas gat:

2-pela kap rais i tan pinis  
4-pela liklik anian (laik bilong yu taso long hamas anian yu yusim)  
1 tebolspun wel o gris  
1 tispun sol

### Rot bilong kukim

1. Katim anian i go liklik. Sapos yu yusim lip anian, orait katim gut ol lip bilong em na as bilong em tu.

2. Putim wel long praipan na putim antap long paia o stov.  
3. Long taim wel o gris i hat, orait autim i go insait na praim. Putim rais na sol tu i go insait na tanim gut. Tanim inap rais i hat na yu ting em inap nau.  
4. Rausim praipan long paia o stov na putim rais i go long plet. Em nau rais i redi long kaikai wantaim wanem abus yu gat.

# Taim bilong stailim

PLANTI MAN-MERI insait long Mosbi na Lae na tu Papua Niugini i ting olsem ol rot bilong mekim gras long het bilong yu i kamap gutpela o i luk stail em i samting bilong ol meri o ol maniman tasol. Tasol mai wan mi tokim yu dispela tingting i popaia liklik.

Rana J Salon long Mosbi em i wanpela ples bilong mekim gras bilong ol manmeri i kamap gut. Dispela liklik haus bilong

mekim gras i stap arere tasol long Angau Draiv long Boroko. Man husat i lukautim dispela haus Mista Andy Hong i bin tok olsem planti ol man i save tingting olsem pasin bilong mekim gras bilong yu i kamap gut i samting bilong ol meri. Tasol em tok dispela em i no gutpela tingting bilong wanem olgeta man o meri i ken senisim stail bilong ol na tu pes bilong ol sapos ol i stailim o wasim gut gras bilong ol.

## gras

ALFRED KANINIBA  
i raitim

Mista Andy Hong husat i bilong kantri Singapore i tok olsem nau planti ol meri bilong Papua Niugini i wok long mekim stail long gras bilong ol na ol i luk smat moa. Tasol em i tok ol man bilong Papua Niugini i stap bihain yet.

Mista Hong i tok olsem planti ol man i save katim gras bilong ol i go daun na i save lusim i stap sot tasol na i no tingting long mekim stail long gras bilong ol.

Em i tok sapos ol man i laik mekim stail wantaim ol kain kain klos bilong ol orait ol i ken stailim tu gras bilong ol.

Planti ol meri nau long Mosbi i wok long go long ples we ol i save komim na wasim gras bilong ol dispela haus i gat ol waitmeri i save wok long ol. Tasol long Rana J Salon olgeta meri husat i save wok long dispela haus em ol PNG meri tasol. Mista Hong em i wanpela man husat i bin kam long helpim ol bilong

wanem meri husat i bosim haus i go holide long Fiji.

Planti ol meri husat i save mekim ol gras bilong ol dispela kain stail haus i tok olsem i gutpela tru. Planti bilong ol i tok i senisim pes bilong ol na i mekim ol i luk gut. Sampela i tok olsem taim ol i komim gras bilong ol nau bai gras i isi tru long komim i no olsem bipo. Wanpela meri i tok "taim oli bin wasim gras bilong mi, mi luk yangpela ken."

Dispela haus Rana J Salon i gat wanpela stori bilong em i stap. I no long taim samting olsem mun Octoba long 1985 wanpela grasrut meri Buang i bin ritim advetismen long niuspepa na em i bin kam long Rana J Salon bilong painim maut dispela em i wanem kain pasin we ol i ken komim gras bilong yu na bai gras i kamap gut. Orait nau taim ol wokmeri i bin tokim em olsem wanem samting i save kamap em i go kisim sampela mani bilong em na i kam na ol i bin komim gras bilong em.

Ol dispela wokmeri i bin tok olsem gras bilong em i sot na i olsem stilwul na ol i no inap long komim. Tasol long taim ol i bin

putim marasin ol kolim jel gras i bin kamap gut.

Man long taim dispela meri i laik traime long komim gras bilong em kom i bin wel tasol i go insait long gras bilong em na em i bin lap nogut tru bilong wanem gras bilong em i malmalumer olsem bilong ol meri Hanubada.

Orait bihain ol wokmeri i bin tokim em long lukautim gut gras bilong em na sapos em i laik go long wanem hap em i mas putin wanpela marasin o ol kolim ektiveta bilong helpim gras bilong em i luk gut.

Man sapos wanpela grasrut meri inap long mekim dispela kain pasin ating planti ol arapela manmeri inap long mekim dispela tu.

Mista Hong tu i tok olsem nau planti ol meri i wok long mekim ol stail bilong ol wantaim gras bilong ol na ol i luk gut tru.

Tasol em tok em i laik lukim moa man i kam long stretim gras bilong ol. Mista Hong yet i bin wok olsem wanpela man bilong katim na stailim gras long Singapor inap 8-pela yia nau na i wok long go het yet.



• Mista Andy Hong i wok long katim grass bilong wanpela meri.

## Namba wan samting em i gutpela helt long olgeta famili.

Famili i gat gutpela sindaun bai i hamamas. Johnson & Johnson i gat olgeta samting bilong mekim famili bilong yu helti na lukim gut.



# Johnson & Johnson



## Kopiket na bagarapim musik

Dia Edita — Mi wanpela grasrut man bilong Aitape long Wes Sepik. Mi save harim ol string ber bilong Wes Sepik long redio na mi save amamas tru.

Tasol, oltaim i save harim ol sampela string ben bilong Wes Sepik i save paitim mambu na ol mambu i no save kraik gut. String bilong gita i kraik narakain na nek bilong man i singsing i narakain olgeta. Na dispela asua i save bagarapim tru gutpela singsing bilong ol.

Mi save sem. Bikos mambu string ben i bilong sampela arapela provins, husat i sevis pinis long paitim mambu. Na taim ol i bung mambu wantaim gita na singsing ol i kamap moa moa yet.

Mi ting long taim lain Ali ailan tasol long Aitape i save smat moa long taim ol i yusim mambu long bungim mambu, gita na nek bilong man. Ating mobeta yumi larim ol Ali tasol i gohet long dispela mambu string ben stail.


Na yumi ol bikpels Wes Sepik, long bus o nambis, maski long kopiket. Bikos yumi traim bai i no inap long kamap gut na string ben bai bagarap olgeta. Yumi mas yusim stail bilong yumi yet.

Yupela save pinis ol arapela provins olsem Not Solomons na Madang i save yusim mambu na ol i top tru. Na sampela ben long Is Sepik tu. Ol Morobe na Manus na Tolai i gat narapela stail na ol i no save yusim mambu.

Na em tasol liklik tok save bilong mi i go long ol pipel bilong Wes Sepik i gat kain kain aidia bilong statim ol mambu string ben.

Yu ken wokim musik, nogat tok long en na em i gutpela. Tasol yu mas yusim stail bilong yu yet. No ken bihainim Ali ailan o wanem hap. Yusim aidia bilong yu yet.

B.F.R. Ruina, Aitape, WSP.



## Wanem developmen i kamap long Sinasina?

Dia Edita — Mi wanpela man bilong Sinasina tasol nau mi stap long Wes Nu Briten Provins. Planti taim tru mi save putim yau long kwesken taim long Palamen tasol mi no save harim liklik nem bilong memba bilong Jogumul/Guluma Mai.

Mi askim dispela memba em i stap o em i dai pinis o olsem wanem? Mi no harim wanpela helpim wok long ol pipel bilong Sinasina. Ating em i wok insait long Jogumul tasol? Em i save raun na kisim wari bilong ol pipel o nogat.

Na em i stap we nau?

Em taim bilong yu i pinis. Na em i taim bilong ol saveman husat i save gut tru long mining bilong kain tokples i save kamap long Palamen na politik long wok developmen long kantri.

Em tasol mi laik tokim yu Mista John Nimi. Sapos yu ritim dispela pas mi laik bai yu memba yet i bekim na i no husat sapota o opisa bilong yu.

Mathias Mebel, Lutheran Misin, Dui Viles,

## Westim taim na mani long kisim biknem

Dia Edita — Mi laik sapatim tingting bilong brata ya Mathew Mai bilong Is Sepik Provins. Pas bilong em i bin kamap long Wantok namba 588 long Sarere, 14 Septemba.

Em i bin askim long wanem as tru na Minista Somare i laik senisim nem bilong kantri. Em i tru brata, sapos kantri i senisim nem bilong em long taim kantri i kisim Independens long yia 1975.

Long senisim nem long laik bilong wanpela man tasol i no

gutpela. Dispela K5,000, em samting nating ol i laik givim olsem prais mani bilong husat i winim resis. Na i tru brata ating long ai bilong Somare dispela K5,000 em liklik mani nating.

Tasol i gat bikpela wok em mani ya i ken givim i go long ol liklik grasrut pipel long ples.

Mi no bin harim ol bikpela kantri olsem Amerika, Ingran, Australia, na Rasia i senisim nem bilong ol. Tasol ol liklik kantri nabaut long Afrika na Asia i wok long senisim nem bikos, kain kain

pait i kamap long kisim pawa.

Ol ami i pait wantaim sivilian gavman. Ol rebel i pait wantaim ami. Ol kain kain hevi olsem. Em long pawa bilong politik tasol. Na long taim nupela gavman i holim pawa nem tu i save senis.

Tasol hia long PNG yumi nogat kain trabel na birua olsem i save kamap. Na wat po skrap nating long kisim biknem tasol na senisim nem bilong kantri. Somare i laikim nem olsem em i bin Praim Minista na i senisim nem bilong Papua

Niugini.

Yupela ol politisen i save wari tumas long ol kain olsem. Mipela liklik manmeri, ol grasrut tru i stap long ol ples long we tru nogat developman i kamap, olsem bikbus na maunten stap bilong Is na Wes Nu Briten.

Ol lapun i stap long ailan Duk ov Yok ailan. Ol viles man tru long hailans olgeta hap long PNG. Ol i no wari na pilim wanem samting yupela toktok long en.

So plis yupela mas sapatim mi nem mas i stap Papua Niugini. Na mi amamas long

gavman bilong Praim Minista Paias Wingti. Em i tok em i no wari long liklik samting nating olsem senisim nem bilong kantri.

Larim Mista Somare i kamap Praim Minista gen na statim dispela resis bilong em. Dispela olgeta bai i no laikim dispela aidia moa.

Mi laik nem Papua Niugini, em kantri bilong mi. Mi no laik arapela moa nem.

Abel Nathan, Kimbe, WNPB.

# Tok save long pe bilong Kadamom

Dia Edita — Mi stap long Kapuku klostu long Goroka taun, Isten Hailans Provins. Mi amamas long harim olsem prais bilong kopi i go antap nau. Tasol mi laik painimaut long prais bilong kadamom na ol kampani ol faktori husat i save baim kadamom.

Mi laik save long ol kampani o faktori husat i save baim kadamom long gutpela prais. Sapos wanpela man o meri i save long gutpela kampani o faktori, em i mas raitim adres o nem bilong faktori long Wantok Niuspepa. Em bai mi ken lukim na save.

Long wanem mi laik salim kadamom na kisim gutpela pe.

Long wanpela taim bipo, mi bin pulimaim kadamom long wanpela bek rais. Mi kisim dispela ful bek kadamom i go salim long Nesenel Plantasin Menesmen Ejensi (NPMA) opis long

Goroka. Na mi kisim K28 tasol.

Mi ting dispela prais i no stret. Mi bilip mi mas kisim bikpela mani moa. Long dispela as mi no laik salim kadamom nabaut. Mi laik kisim gutpela pe stret long kadamom bilong mi.

Mi laikim wanpela

man o meri i helpim mi long dispela hevi. Wanem faktori o kampani i save givim gutpela pe long kadamom? Ol i save makim pe o prais bilong kadamom olsem wanem?

Agare Koni, P.O Box 10, Goroka, EHP.

## Ol siti manmeri i rabisim ol bikrot

Dia Edita — Mi wanpela lebaman bilong Woks na Saplai Dipatmen long Mosbi. Olgeta taim mi save katim gras long arere long ol bikrot. Na mi laik autim wanpela bikpela wari.

Mi save lukim planti bikpela bek, emti katen na 44-galen dram i pulap long pipia na slip arere long bikrot namel long Sogeri, Varirata Nesenel Pak na Tanubada faktori. Em i no gutpela pasin long tromoi kain kain rabis nabaut arere long bikrot. Ol dispela rabis i no kam long ol pipel bilong kantri sait. Em ol pipel bilong taun eria i kisim ol dispela rabis i go tromoi.

Yupela ol wokman bilong Nesenel Kapital Distrik Interim Komisin o Siti Kaunsil i mas lukluk long setelmen long Morata, Jun Veli, Tokarara, Hohola, Sabama, Kaugere, Kone, Korobosea, Sikis Mail, Gordons na Erima. Yupela i mas kaunim ol seksen na lot namba bilong ol dispela eria. Na yupela i mas salim mumut ka long karim ol pipia bilong ol dispela eria na kisim i go tromoi long ples bilong rabis.

Mosbi siti i gat tupela ples tasol bilong tromoi pipia, em long Sikis Mail na Baruni. Yupela ol wokman bilong Interim Komisin i mas opim ai na sekap long ol ka husat i laik haitim rabis na karim i go ausait long kantri sait. Ol dispela kain pipel i no laik long lusim mani bilong baim sevis bilong mumut ka. Na ol i giaman long kisim pipia i go tromoi nabaut long bikrot.

Sapos yupela ol manmeri bilong Mosbi siti eria i ritim dispela pas, yupela i mas senisim tingting. Yupela in o ken kisim rabis i kam tromoi nabaut long Tanubada faktori eria i go antap long Sogeri. Yupela i mas kisim rabis i go stret long ples bilong pipia.

Naime Supio, Sogeri Rot, Rouna, Sentral Provins.

## Salim F28 long Hayfil ples balus

Dia Edita — Watpo F28 balus i no save pundaun long Hayfil ples balus. Mi wanpela boi bilong ples Kautum long hap bilong Wosera. Planti taim mi save toktok long putim bikpela ples balus long Hayfil.

Long taim mi stap long Kieta mi bin harim long redio olsem bai F28 balus i punaun nau long Hayfil.

Olsem wanem? Mipela Maprik na Wosera mipela gat bikpela populesen i stap. Ol bikman bilong

gavman inap yupela lukluk long dispela wari o nogat, bilong kamapim Hayfil ples balus.

Stoney Em Kuaru, Takua Plantasin, ENB.

**Salim pas i kam long: WANTOK NIUSPEPA PO BOX 1982 BOROKO NCD**

## Palamen i no haus pilai

Dia Edita — Ol memba na ol minista i save mekim wanem kain wok long Palamen Haus? Ol i save kam long kibung long palamen tasol mi ting olsem ol i no save kam long kibung. Ol i save kam long pilai olsem ol liklik manki nau tasol mama i karim ol.

Yupela ol memba na minista i mas tingim gut turangu ol pipel. Ol i no makim yu long go long haus palamen na pilai olsem liklik

manki. Pipel i makim yu long kamap mausman bilong ol na toktok long wanem kain samting ol i laik i kamap long hap bilong ol.

Tingim gut. Palamen Haus em i no pilai haus. Em ples we yu karim ol komplemen bilong ol pipel bilong i go na tu bilong toktok long wok bilong developmen.

Alphonse Sarin, June Valley, NCD.

## Wantok yet semim nem Simbu

Dia Edita — Mi save lukim planti man bilong Simbu Provins i pilai laki tiket long Eriku na Taun bas stap insait long Lae siti. Ol dispela man i save singaut long 10 toea na 20 toea. Ol i save singaut olsem pikinini pisin i laik kisim kaikai long mama pisin.

Mi lukim dispela pasin i no gutpela tumas. Sapos ol manmeri husat i no gat rot bilong painim mani i mekim dispela pasin long singaut, em i orait. Tasol yupela ol dispela lain man husat i no longlong, aipas, lek bruk na hanbruk i no gat sem tru long bihainim dispela pasin.

Sapos yupela i singaut long mani long taim bilong bikpela so o pilai, em i orait. Tasol maski long sanap nabaut long taun na singaut nabaut long ol taim nating. Em i no gutpela tumas.

Mobeta yupela i mas sem long dispela kain pasin na lusim laki tiket pilai. Long wanem yupela ol dispela Simbu man i mekim na pipel bilong ol narapela provins i tok baksait long yumi.

James Goga, Kupau Kompau, Lae.



# Look again at NISSAN PATROL



LOOK AT THE STRENGTH

Welded unitary construction for maximum strength.

LOOK AT THE POWER!

P40 Petrol delivery 150HP/3,800rpm power, or SD33

FEEL THE RIDE!

Progressive suspension (Leaf-spring front and rear) plus full-floating front axle.

TRY THE TOUGHNESS!

Extra strength ladder-type frame with protective guards below. High level road clearance.




**Good lookers, great performers on-road and off-road!**



**NISSAN PATROL Hardtop  
NISSAN PATROL High Roof Hardtop  
NISSAN PATROL Station Wagon**

*Look in and see the good guys!*



# BOROKO MOTORS



BOROKO MOTORS: Port Moresby—25 5255 ● Lae—42 1144 ● Rabaul—92 2777 ● Madang—82 2433 ● Mt. Hagen—52 1433 ● AGENTS AT: Arawa Motors. Arawa—95 1566 ● Higaturu Motors. Popondetta—29 7175 ● Provincial Agencies. Kavieng—94 2131 ● Tora Motors. Wapenamanda—57 4059 ● Milne Bay Enterprises. Alotau—61 1167 ● Al's Auto Repairs. Goroka—72 1848.



Primia i no gat rait long stapim ol dispela pipel. Bikos aninit long mama lo bilong kantri (Konstitusen) ol pipel i gat rait long wokabaut i go i kam long wanem hap ol i laik.

Bm i tok, ol kampani i no moa save raun rikrutim ol pipel moa olsem bipo. Nau moa na moa Hailans, Not Solomons, Sepiks, ol yet i kisim ka bihainim bik rot kamap long Lae kisim sip i go long Rabaul o wanem taun na painim wok long ol plantasin nabaut.

Mista Stein i tok, "Sapos Primia bilong Saten Hailans i kisim mipela i go long kot, em yet bai painim i no gutpela as long en."

British Niugini Developman kampani i bin i stap long Mosbi inap klostu 10-pela yia nau. Ol i gat 9-pela

bisnis projek, rabata plantasin, long Doa, Itikirnumu long Sogeri, Paili banis bulmakau long Kupiano, Hisui kokonas plantasin na kanusia banis bulmakau. Na i gat 4-pela arapela moa.

Dispela ol plantasin i gat moa 1,300 pipel i wok long ol fultaim. Na olgeta plantasin ya i stap long Sentral provins tasol.

Mista Stein i tok, bikos ol asples Sentral provins pipel i no laik wok long plantasin olsem na kampani i kisim wokman i kam long arapela Provins.

Mista Stein i tok, dispela kain wok em i bilong ol man i no skul bipo. Ol i rikrutim ol long ol ples. Dispela em pe nau ol pipel wok long ol dispela 9-pela plantasin i save kisim. Tasol sapos ol i wok hat na ova-taim, i ken i go antap long K100.

# Martin Morububuna - lewa bilong em i pas long tin pen



**PASIN BILONG** droim ol piksa long wol bilong ol haus i no nupela samting long PNG. Bipo ol tumbuna bilong yumi long PNG i save droim ol piksa long ol wol bilong ol haus tambaran, haus yam, na long haus slip tu.

I gat planti as bilong droim ol dispela piksa. Sampela hap ples i droim piksa bilong soim tumbuna stori, sampela i droim piksa bilong soim mak bilong lain wanpisi o wan bet bilong ol. Sampela i droim tasol ol pes bilong ol twel o masalai long hap bilong ol. Na ol dispela droing tu i save mekim ples o haus i luk nais tru.

Nau dispela kain pasin i no lus yet. Sapos yu lukim Palamen haus long Mosbi, o ol haus tumbuna o sampela bikpela opis o hotel o ol skul long PNG bai yu lukim kain pasin i stap. Ol waitman tu i gat dispela kain pasin. Na dispela kain pasin bilong droim ol piksa long wol ol i kolim Mural.

Sapos yu go long Yunivesiti bilong Papua Niugini long Mosbi bai yu lukim sampela kain mural droing olsem i stap. Dispela ol droing i soim ol kain laip nau i stap long Papua Niugini.

Na i no Yunivesiti tasol. Kain droing olsem tu i stap long Haus sik, bikpela haus tumbuna long Mosbi, Boroko Hotel, Tokar-

## Pat Matbob i raitim

ara Katolik Haus Lotu na ol narapela liklik ples tu.

Dispela ol naispela droing i kamap long han bilong wanpela saveman tru bilong dro husat i bilong Trobriand Ailan long Milen Be Provins.

Dispela man, Martin Morububuna, i bin kisim save long dro long Nesenel At Skul long Mosbi. Na nau em i kamapim wanpela liklik kampani bilong em, Sai Ats.

Martin i bin kamapim Sai Ats long Septemba las yia wantaim tripela help man bilong em.

Wok bilong Sai Ats em long kisim wok kontrak long droim na penim ol piksa long wok bilong ol haus insait long Mosbi.

Long taim Martin i lusim At Skul long 1982 em i bin gat tingting long kirapim kain kampani olsem. Em i laik bungim ol Nesenel Atis insait long kain kampani olsem bai ol i ken mekim wok insait long Mosbi na PNG. Martin i no bin i gat inap mani long statim dispela kain kampani yet.

Tasol save bilong em long dro i sot. Long 1983 em i wok olsem wanpela komesel atis wantaim Word Publishing Kampani, Human Resource Developmen Ajensi na Plis Dipatmen. Tasol Martin i no amamas

tumas long mekim ol dispela kain wok.

Lewa bilong em i pas stret long ol tin pen.

Long 1984 Martin i kisim wanpela askim i kam long Nesenel At Skul long wok wantaim wanpela atis bilong Australia Carol Ruff long sampela mural droing long wol bilong ol haus long Yunivesiti.

Martin i no bin mekim ol kain bikpela droing olsem na ol samting em i bin lainim long dispela taim i bin helpim em tru.

Dispela wok tasol i bin mekim na Martin i bilip tru olsem em inap long mekim ol droing long wol bilong ol haus. Em nau em i bin kisim narapela kontrak long dro long ol wol bilong Mosbi Jeneral Haus sik wantaim ol Nesenel At Skul studen.

Bihain Martin i bin bungim ol tripela help man na em i droim ol mural long Tokarara Katolik Haus Lotu, Boroko Hotel, Pos na Telekomunikesen, na long Mini-maket long Aviat Klap.

Nau Martin na kampani bilong em i gat sampela wok long mekim long Nesenel Museum na haus bilong Gavana Jeneral.

Ol dispela piksa bilong Martin i nais tru na i soim olsem em i saveman tru long kain wok olsem. Martin i save droim ol laip long ples bilong em yet long Milen Be na tu long ol nupela laip i stap nau.

Martin i tok em i no laik stail bilong ol

droing bilong em i mas luk olsem i kam long Milen Be tasol. Em i tok em i laik stail bilong em karamapim stret olgeta kain stail bilong PNG. Em i laik droing bilong em i kamap olsem bilong PNG stret.

Tasol i luk olsem sapos Martin i laik mekim olsem em i mas spenim moa taim long stadi gut ol at bilong PNG. Na Martin i tok em i no wari. Em i laik spenim moa taim long tingting, stadi na kisim gut save long ol kain laip i stap long PNG.

Martin i tok em i save mekim ol wok nau bikos em i mas painim sampela mani long lukautim famili bilong em.

Sai Ats Kampani i save mekim ol arapela at wok tu. Ol i save prinim ol 'T' siot na kavim ol makmak antap long ol sia na tebol samting. Wanpela eksampel bilong kain wok disain bilong Martin i stap long sia bilong spika long Palamen.

Wok bilong droim ol mural i no isi. Martin i save lusim samting olsem K500 na K700 baim ol samting bilong mekim wanpela mural droing. Na pe bilong ol wokman tu i save bringim mak i go antap

moa long K1,000 (wan tausen) samting long wan wan wok. Olsem na em i save sasim samting olsem K2,000 long wanpela mural droing.

Martin na meri bilong em Jane, pikinini meri Artis, na tupela pikinini boi, Alvin na Valentine i save stap long Gerehu.

Sapos kampani bilong Martin i go bikpela, em i tingting long mekim tupela samting.

Namba wan samting em i laik givim sampela wok i go long ol yut insait long Mosbi. Na namba tu samting em i laik traim kamapim inap mani long helpim ol pipel long ples bilong em long kirapim ol haus lotu.

Em i tok em i bin kisim plenti i kam long ples bilong em long mani bilong kirapim ol haus lotu. Na nau em i ting bai em inap helpim ol pipel bilong em.

Martin i bilip olsem kain kampani bilong em i namba wan kain kampani insait long PNG. Inap nau em i bin wok insait long Mosbi tasol long ol sampela ples insait long ol narapela provins i bin askim em pinis long go wok long hap bilong ol.

## PAPUA HOTEL



WIK DE KAIKAI

Mande inap Fonde K5.00

Spesel kain kaikai olgeta Fraide K8.50

Bilong wanem wetim sevis? Bilong wanem lusim moa mani Kisim bikpela, gutpela kalkal long liklik pe

PAPUA HOTEL (Lessee Suckling Enterprises Pty Ltd) Telepon: 21 2622 na mekim buking.

## CALLING ALL BANDS

MIPELA SALIM OL SAMTING BILONG MUSIK

BATERI AMPLIPAIA bilong gita Lead - K95.00 Bass - K100.00 Special Lead - K100.00 AMPLIPAIA SPIKA DRAM GITA TRUMPET TROMBONE FLUT LET BILONG GITA STRING SKIN BILONG DRAM OL SONG BUK NA CORD BUK


\* Mekim pairap bilong gita nating olsem pawa gita wantaim GUITAR PICK-UP K23.00

## ROOK'S RADIO

P.O. BOX 191, LAE, P.N.G. TELEPHONE: 42 4616





• Famili bilong Martin. (Lep i go Rait) Geoffrey Kelakasi (help man bilong Martin), pikinini gel, Artis, Valentine, Martin, Alvin na meri bilong em Jane.





# OL PAPA BILONG KAMPANI\*



**I amamas tru  
long kamap**

**pablisa bilong dispela tupela  
namba wan niuspepa bilong  
PNG stret.**

# **TIMES**

**of Papua New Guinea**

# **Wantok**

**\* Word Pablising Kampani i gat 4-pela bikpela Sios insait long Papua Niugini i papa long en: Katolik (750,000 memba) Luteran (550,000 memba) Yunaitet (300,000 memba) na Anglikan (220,000 memba).**

**NA SAMTING OLSEM 6-PELA MANMERI NAMEL LONG 10-PELA PIPEL LONG OLGETA HAP BILONG PAPUA NIUGINI I GAT NEM LONG DISPELA KAMPANI.**



# Soim rot - helpim raskol

**KLOSTU olgeta de, yumi save harim long redio na ritim long niuspepa long ol pasin raskol.**

Na i luk olsem klostu olgeta liklik kibung yu lukim, maski bilong famili o kain kain grup, ating planti bilong ol hap toktok o topik bilong stori bilong ol em RASKOL.

Tasol toktok na stori bilong yumi i mekim wanem long helpim ol dispela lain. Na em i no isi wok long helpim ol dispela kain pipel long bihainim stretpela pasin.

Long Not Solomon, long wanpela Misin Stesin ol i kolim Koromira, wanpela kain sistem o we bilong helpim ol manki i bagarap long pasin raskol i sanap pinis. Dispela sistem i stat las yia yet.

Wanpela Katolik bruda (Br) husat i givim bikpela helpim bilong em long skulim na helpim ol manki i mekim pasin raskol i lusim pinis Not Solomons long 20 Janueri na i go bek skul. Man ya em Br Mika. Em i bilong Sosaiti bilong Maria, ol i kolim Maris. Br Mika i

bilong wansolwara, Pasifik. Ailan bilong em Walis, klostu long Futuna long Fiji.

Dispela we o sistem long Koromira, Katolik Sios bilong daiosis i sanapim bilong traime helpim ol manki i bagarap long pasin nogut. Pasin spak i wok long trikim sampela. Ol i painim giaman strong long botol. Taim botol i empti, ol tu i empti. Dispela paul nabaut bilong manki i save kamap long taim manki i mas lusim pasin pikinini na stat kamap bikpela na lukautim em yet.

Planti long ol dispela manki inap kam bek long God na lusim pasin paul na raskol bilong ol, sapos narapela man i helpim ol. Tru em i hat stret long stretim yangpela i paul pinis. Tasol ol i pren na wantok bilong yumi. Yumi wantaim helpim bilong God i mas helpim ol long gutpela tingting na pasin.

Nesenel Gavman i tok orait long lainim sampela manki i mekim rong long lusim kalabus long laisens na sindaun aninit long han bilong Peris Pris

## Sophie Ramram i raitim

bilong Koromira, Fr Herman Worste na tupela brata, Br Patrick na Br Mika. Sios i tok orait tu long helpim na lukautim ol long kam bek long God na rispektim ol papa na mama, pipel na gavman.

Ol yangpela long Koromira tu i mas agri o tok orait long lusim pasin giaman, harim tok na kisim trening long wok olsem fama o man bilong pulim pis. Ol i kisim tu Korespondens kos.

Br Patrick, wanpela Maris brata i skulim ol manki long kamap fama long kakaruk na gaden. Ol manki statim pinis ol fam bilong ol long ples taim ol i stap yet long Koromina. Ol manki i fomim ol grup na go long wanwan ples bilong ol na mekim sampela wok developmen. Long dispela we, bai ol i stap klostu long papamama na ol pipel. Na taim ol i lusim Koromira, bai ol i go het long projek bilong ol, em ol i statim.

Br Mika, wantaim save bilong ol ailanman, i skulim ol manki

long ol we bilong kisim pis. Long pis, ol inap kisim mani long kirapim liklik projek. Na tu ol inap kirapim bisnis bilong kisim pis. Br Mika i kam long we long helpim dispela wok i go het.

Mista Daivd Mamats, Katolik Edukesen Seketeri i helpim tupela brata long tisim ol manki sampela korespondens kos. Dispela kos inap helpim bisnis bilong ol manki.

Ol papamama na komyuniti i amamas long dispela sistem i kirap. Em i helpim ol pikinini long kamap bikpela na stretpela man i gat save na namba. Na ol i winim gen gutnem na rispek namel long ol pipel ol manki ya inap winim gutnem sapos raskol pasin i no daunim ol.

Na dispela em mining bilong rihabilitesen.

Nesenel Gavman i no helpim dispela wok, em i lukluk tasol. Em i tingting long statim long narapela provins tu, sapos provins i orait. Not Solomons i tok orait na gavman i givim bikpela helpim wantaim ka bilong karim ol manki i go long ples, we ol i kirapim wok fam bilong ol. Ol i ken go i kam long lukim liklik fam projek bilong ol, taim ol i stap yet long Koromira.

*"No ken rabisim ol manki nogut na trabelman." Dispela tokpiksa bilong ol bruda bilong Not Solomons long helpim komyuniti bilong yumi ron gut. Piksa i soim tupela yangpela man i wok wantaim Br. Patrick.*



## Sande lotu

Frank Mihalic

### DIWAI KROS LONG LAIP

Sande Lotu 16 Februeri 1986

I GAT wanpela stori i go olsem. Wanpela man i kros oltaim long God bikos em i mas karim ol kain kain diwai kros long laip bilong en. Em i karim sik na wari na pen na trabel. Na oltaim em i komplon long diwai kros bilong em i hevi tumas, na bilong ol arapela man i luk isi.

Olsem na God i les na i tokim dispela man olsem, "Orait, yu kisim diwai kros bilong yu na yu kam, na yumitupela i go long faktori we ol i save wokim ol diwai kros. Yu ken lukluk nabaut na sapos yu painim wanpela narapela diwai kros i pas moa gut long yu, orait, yu ken senisim wantaim dispela bilong yu."

Man ya i harim dispela gutpela nius na em i hepi tru. Man! Nau em i ken painim wanpela diwai kros i isi long karim.

Orait, tupela i kamap long faktori, na tupela i go insait long dua, na God i tokim man olsem, "Orait, yu lukluk nabaut tasol, na sapos yu painim wanpela diwai kros yu laikim, orait, yu ken kisim."

Orait, man i tekewe diwai kros long solda bilong em na i sanapim klostu long dua. Na nau em i stat long raun nabaut insait long faktori na traime ol diwai kros nabaut. God i sanap tasol na i lukim em.

Nau man ya i litimpaim wanpela diwai kros na i nogat hevi bilong en olgeta. Em i putim long solda na i wokabaut na i karim em liklik. Tasol em i no laik. Win i tromoim dispela i go i kam na i rabin solda bilong man. Em i putim bek.

Nau em i kisim narapela. Dispela i luk nais, tasol em i kwila, na i hevi tumas. Kwiktaim man i putim bek. Narapela gen i longpela tumas na i paitim graun. Narapela i sotpela na i paitim lek bilong man long taim em i wokabaut.

Man ya i traime traime na olgeta wan wan diwai kros i gat sampela rong o asua bilong en. Klostu man i laik givap, na las tru em i painim wanpela diwai kros i lep na i slip long banis. Em i traime, i wokabaut wantaim em, na em i laikim em tru. Dispela wanpela tasol i stret long em. Olsem na em i tenkyu long God na tupela i wokabaut i go ausait long faktori. Na

God i tanim long dispela man na i tokim em olsem "Pren, mi amamas long lukim yu painim pinis wanpela diwai kros i pas stret long yu. Tasol ating yu lus tingting liklik. Dispela diwai kros yu painim klostu long dua, em i dispela yu yet i bin bringim i kam insait." Man ya i lap. Em i kisim save pinis.

I olsem tasol long laip bilong yumi wan wan. Yumi olgeta i mas karim sampela kain diwai kros long laip bilong yumi. Diwai kros long laip em i min: sik na pen na wari na hatwok na sore na ol kain samting yumi no laikim. Na yumi olgeta tu i save komplon long dispela. Yumi save lukluk nabaut na i luk olsem, ol arapela pipel i gat diwai kros i isi, na bilong yumi tasol i hevi.

Tasol lukaut! Olsem stori bilong yumi i bin tok: God i save tumas long givim diwai kros i pas stret long yumi. Man i laik senisim, em bai paulim. Mobeta yumi larim long han bilong God.

Tasol yumi askim nau: Bilong wanem na i gat ol dispela kain samting nogut long laip bilong yumi, ol dispela diwai kros? Ating, em i bikos tumbuna Adam i bin paulim dispela graun, na inap nau yumi mas baim rong bilong em.

Tasol narapela tingting i go olsem: God i no laik bai yumi lus long ol samting bilong dispela graun na bai yumi lus tingting long heven — em ples tru bilong yumi. Olsem na em i mekim kain kain samting bilong raun i sol long yumi. Em i pasin bilong yumi, yumi laikim tuma ol switpela naispela samting, yumi laik pinisim olgeta kain laik — nau tasol. Yumi laik slip na les na malolo na kaikai na dring na pilai. Na wok, maski; taitim bun, maski. Olsem na God i salim pen na kros na sik na hevi bilong stretim dispela tingting bilong yumi.

Sapos yu laik kliaim tingting bilong yu long dispela aidia long God i salim diwai kros i kam long yumi, orait, yu opim Nupela Testamen na yu ritim Luk, sapta 2. Em i stori long Jisna na Mariafna Josef i painim planti wari. Na tingim gut dispela lain: Luk 2, 35.

## Mi pret long puripuri

### DIA LAIPLAIN,

*Mi gat bikpela kros wantaim narapela meri long sampela wik bipo. Boipren bilong mi i bin prenim dispela meri bipo. Tasol em i lusim dispela meri na i prenim mi. Na dispela arapela meri i belhat tru long mi nau.*


*Long las wik mi painimaut olsem wanpela hap laplap i lus long bilum bilong mi. Mi save yusim dispela laplap long pasim gras bilong mi. Mi harim sampela tok olsem dispela meri i laik yusim dispela hap laplap long mekim puripuri na bagarapim mi.*

*Mi gat bikpela pret tru long dispela kain tok bilong puripuri. Mi pilim olsem mi gat sik nau. Mi no save kaikai gat na mi no gat strong.*

*Mi save go long wanpela sios na lotu long olgeta wik. Tasol mi sem long toktok wantaim pris bilong mi long dispela wari. Long wanem dispela pris i waitman. Na mi ting em bai no inap klia tumas long dispela wari bilong mi.*

*Inap yupela i helpim mi long stretim dispela wari o olsem wanem?*

### PRETMERI



### DIA PREN,

Yu mas prea long God long givim yu strong long daunim dispela pasin pret. Na yu mas go stret nau long pris na autim dispela wari bilong yu long em.

Maski dispela pris i waitman. Em bai gat save tu long dispela kain hevi, sapos em yet i bin wok insait long PNG long planti yia bipo. Long wanem em i mas helpim planti arapela manmeri husat i bringim dispela kain hevi i go long em bipo, laka?

Sapos dispela pris i no inap helpim yu, em bai salim yu i go long sampela man o meri insait long dispela sios kongrigesen bilong yu. Bikos em yet i mas klia

long sampela pipel husat i ken helpim yu long stretim dispela wari.

Yu bin go na lukim wanpela dokta pinis long dispela sik bilong yu o nogat? Sapos nogat, yu mas go long wanpela haus sik na tokaut long dispela sik. Em bai ol wokmanmeri bilong haus sik i ken givim marasin long stretim dispela sik.

Sapos yu gat hevi long bilip bilong yu long pasin bilong sios, yu mas lukim wanpela sios lida. Sampela sios i gat wokman bilong meri kaunseling sevis. Na ol dispela lida o wokman i ken helpim yu long daunim dispela pasin pret i stap long tingting bilong yu.

### MI LAIPLAIN.



# Dok i stilim paia bilong masalai

BIPO TRU long tudak taim bilong ol tumbuna, i no gat paia. Ol manmeri i save draim kaikai bilong ol long san tasol na kaikai.

I gat wanpela ailan we i bin gat paia long en. Tasol, ol manmeri bilong dispela ples i save pret tru long wanpela lapun masalai meri husat i save bosim dispela ailan. Olsem na ol manmeri i save pret tumas long go kisim paia long dispela ailan.

Wanpela de kukurai bilong dispela ples i putim tok long olgeta man, na em i tok, "Sapos wanem man tru i kisim dispela paia long ailan masalai bai dispela man i maritim pikinini meri bilong mi."

Bikman bilong ples i tok olsem na bel bilong ol man i sut nogut tru. Long wanem pikinini meri bilong bikman ya, em i no meri nating. Em i winim olgeta meri long ples na kwin stret.

Olsem na long nait long hausboi olgeta man i no slip liklik. Nagat: Ol i wok long stori i stap long maritim dispela



meri.

Long moning taim tru tulait i no bruk yet, wanpela lapun man wantaim dok bilong em i go lukim bikman bilong ples na i tokim em, "Mitupela i laik traim dispela resis long kisim paia."

Tasol bikpela i tokim lapun ya olsem, "Yu lapun tumas, maski yu go bek na i stap."

Lapun ya i strong moa long go na bikman i tokim em. "Yu strong tumas, em i orait, yu ken traim. Na sapos yu lus bai olsem wanem?"

Tasol long namba tri de moning taim san i sut i kam antap, lapun man ya i lukim wanpela blakpela samting i kam longwe long solwara yet, na lapun i amamas liklik.

Em i sindaun glas yet i stap na em i lukim dok bilong em i kam klostu pinis

wantaim hap paia i stap long maus bilong em. Lapun i amamas tru na wokabaut i go long rip na holim pasim dok bilong em. Na em i rausim hap paiawut long maus bilong dok na em i karim dok na paia i kam antap long nambis.

Klostu tru paia i laik indai. Tasol lapun ya i wokim bikpela paia tru nau na kukim sampela kaikai. Na taim tupela i kaikai, man kaikai i swit moa yet. Bipo yet tupela i no save kaikai em ol i kukim long paia. Tupela i amamas tru na long moning taim tru, tupela i lusim nambis na i go long ples.

Long taim ol i kamap long ples. Tupela i go stret long haus bilong kukurai ya na kirapim em. Em i kirap lukim paia na em i amamas nogut tru. Em i paitim garamut na singautim olgeta manmeri long kam lukim paia.

Long man i tok, "Em i orait sapos mi poapia masalai meri i ken kaikaim mi. Tasol bai mi salim dok bilong mi kam bek. Na long taim yu

lukim em, bai yu save olsim mi dai pinis.

Yupela i save olsem long bipo tru ol dok i save harim wanem toktok ol man i tokim ol. Olsem na lapun ya i tokim dok bilong em, "Yu mas hait klostu long paia na was long win. Nogut win i karim smel bilong yu i go na masalai meri i smelim na bai i kam kilim yu."

"Na sapos win i kam olsem long pes bilong yu orait yu mas go long sait long win, em bai masalai meri i no ken smelim yu. Yu mas was gut tru. Sapos lapun masalai meri i kirap i go insait long haus bilong em orait, kwik taim yu mas ran spit i go na pulim hap paiawut long maus bilong yu na ranawe i kam."

Dok i harim olgeta dispela toktok pinis na em i stat long swim i go inap papa bilong em i no lukim em moa. Lapun papa i wet long dok inap tupela de pinis. Na em i ting ating lapun masalai meri i kaikai dok bilong em pinis, o ol bikpela pis bilong solwara i daunim em.

Long taim ol i kam lukim, man ol i kirap nogut tru, na amamas wantaim. Kukurai i tilim paia nau long ol manmeri. Em nau ol meri i go long gaden na kisim kaikai na brukim paiawut tu na karim i go long ples. Bipo ol i no save kisim paiawut bikos i nogat as long painim paiawut tu ya.

Na ol man i go long bus na kilim planti abus. Na Kukurai i makim sampela yangpela manki long bung ol liklik paiawut na mekim save long wokim paia i stap.

Long apinun dispela ples i pulap long ol pipel na ol meri na man i redim bikpela kaikai. Ol i singsing na olgeta manmeri i wokim bikpela paia na singsing raunim paia i go inap tulait.

Long moning taim tru kukurai bilong ples i laik givim pikinini meri bilong em i go long lapun man ya. Tasol lapun man ya i tok, "Mila lapun tumas long marit olsem na maski yu ken givim pikinini bilong yu i go long ol

narapela yangpela man."

Olsem na Kukurai i lukautim lapun, ya na dok bilong em i go inap long taim tupela i dai.

Na sapos yu lukim wanem dok i slip arere long paia oltaim. Em olsem dispela dok i kamap long famili bilong dispela tumbuna dok bipo i go karim paia i kam long ailan bilong lapun masalai meri.

**John Daniels.**  
**Brandi Haiskul,**  
**Wewak, ESP.**




## Lep i go long rait

1. Wanpela kain kumu.
5. Sapos dispela pis i sutim yu long tel bilong en, em bai pen nogut tru.
8. Yunaitet.....
11. Yu (Tok Motu)
12. Pulap long
13. Ol lain em bai lukautim ol refuji nau.
15. San i save kamap long en.
18. Mosbi.
20. Taun long Wes Sepik.
23. Hap pepa i givim tok orait.
24. Ol i save lukautim ol sikman.
25. Masket.
26. Poisin
28. Man i save bungim ol pipia.
31. Sapos tude em Fraide, Fonde em dispela.
33. Foapela lek
34. Oke
36. Painap
38. Ol Sepik Wara i save kukim sak sak olsem.
40. Samting bilong opim lok.
41. Singsing bilong Siasi.
42. Samting bilong opim tin.
43. Memba bilong Palamen.
44. Wes..... Briten.

## Antap i go daun

1. Wekap
2. Ol Tasman Ailan.
3. Lait i..... i stap

## SKRUIIM TOK



4. Em nau
6. Sampela haus i sanap long en.
7. Subim t'et i go insait long dispela hap bilong nil.
9. Ples bilong sanapim ol kap na plet.
10. I no long san
14. Ol kauboi save raun long en.
16. I no long nait.
17. Ai, nus, na maus i stap long en.
19. Yakaiye!
21. I no hatwok
22. Wok mani
27. Nois
29. Pikinini man
30. Sutlam
32. Sapos i no gat klaut, bai yu lukim dispela

- long nait.
33. Ol balus i save karim dispela wantaim ol pasindia.
35. Ol man i save mekim dispela long ol botol bia.
37. SP long tin em dispela kain bia.
39. Prut em i redi long kaikai.

## Ansa bilong las wik


Lep i go long rait

1. Tel
4. Ista
8. Kat
11. Pos
13. Tisa
15. Mi
17. Karim
19. Nois
21. Is
22. Pul
23. Bal
24. Jaminan
26. Ol
27. Ihu
29. Muliap
31. Pinat
34. Putim
35. Ia
36. Fores
37. Mr
38. Aran
40. Skai
42. Maski
44. Angka
46. Tisim
47. Op
48. Aiglas

## Antap i go daun

2. En
3. Lek
5. Stilim
6. Tim
7. As
9. Ami
10. Sisil
12. Kapa
14. Animit
16. Pilipins
18. Rum
20. Ol
23. Balus
24. Jun
25. Nupela
26. OPM
28. Hia
30. Aigris
32. Afrika
33. To
37. Man
38. Akis
39. Namo
41. Kap
43. Sta
45. Ai

## Painim tewel





## Nogat mani long salim meri soka tim long Nu Silan

BIKPELA AMAS na wok redi bilong salim meri soka tim bilong Papua Niugini i go resis long Nu Silan i popaia. Long wanem i no gat mani.

Papua Niugini Futbol (Soka) Asosiesen (PNGFA) i makim 26 meri pilaia long resis long bikpela Oseania women's soka sempiansip resis insait long Nu Silan namel long 29 Mas i go inap 12 Epril long dispela yia.

Menesares bilong tim, Kay Binding i tok dispela wok redi bilong bungim mani i kirap long Oktoba las yia. Ol meri i wok long trening na sambai. Tasol i no

gat gutpela helpim bilong painim mani namel long Oktoba las yia i kam inap long dispela mun.


Binding i bringim kamap dispela wari long kibung bilong PNGFA eksekutiv komiti insait long Mosbi long las wik Tunde. Kibung i pasim tok olsem "maski long salim dispela meri tim bilong PNG i go." Long wanem ol i luksave olsem bai nogat sans tru long bungim dispela K25,000 namel long dispela mun i go inap long mun Mas.

Binding i tok dispela hevi i givim bikpela helhevi gen long ol

meri pilaia na daunim poin bilong soka insait long PNG. Long wanem dispela pilai inap kamap namba wan ovasis soka resis tru bilong ol meri

Presiden bilong PNGFA, Wep Kanawori sori tru olsem ol meri pilaia bai popaia long dispela bikpela soka resis. Tasol ol meri i no ken sutim toktok bilong dispela asua i go i kam. Long wanem ol yet i no go pas long putim kamap liklik mani na traim long kisim helpim.

Kanawi i bilip bai dispela asua i bagarapim gutpela go het bilong soka pilaia long PNG.



## Arua na Lailai bai wokim Rabaul i guria liklik

SUGAR RAY Arua bilong Mosbi bai salensim Raphael Lailai bilong Rabaul long profesenel laitwet boksen resis long tupela wik bihain. Na ating Rabaul taun bai guria liklik long taim paia i laik namel long tupela boksa ya.

Dispela boksen resis bai kamap long ToBunbun Hall long Rabaul, Is Nu Briten Provins long Sarere nait, 15 Februari. Em i wanpela non-taitel pait bai go inap long 10-pela tri minit raun. Na bai gat moa long 500 pipel i kamap long lukim dispela pait. Long wanem i no gat wanpela profesenel boksen resis i kamap long Rabaul inap tripela yia nau.

Dispela boksen resis bai namba tu profesenel pait bilong tupela boksa wantaim.

Arua i bin pait egensim John Waiaki bilong Goroka long namba wan pait long mun Desemba las yia. Na em i nokimaut Waiaki insait long namba tu raun bilong dispela 6-pela raun resis.

Lailai i bin pait wantaim John Hisa bilong Arawa long mun Desemba tu. Na em i nokimaut Hisa insait long namba wan raun. Olsem na em i gat wankain rekot bilong nokimaut birua boksa insait long namba wan pait bilong ol.

Dispela pait bai kamap aninit long sponsa bilong Bougainville Boksen Promosen kampani bilong Arawa, Not Solomons Provins. Tupela papa bilong dispela kampani, Joe Koredong na Barry Middlemiss i tok bai i gat 7-pela amata boksen resis i kamap na sapatim dispela profesenel pait. Na Presiden bilong Rabaul Amata Boksen Asosiesen, Ben Tami i makim 14 amata boksa

pinis long soim stail bilong ol insait long resis.

Middlemiss i tokaut tu olsem ol i kisim Lailai long pait long nem bilong dispela promosen kampani bilong ol. Lailai long pait long nem bilong dispela promosen kampani bilong ol. Lailai bai stap long Rabaul na mekim trening bilong em. Tasol dispela kampani bai go pas long stretim rot bilong em.

Em i tok tu olsem ol i mangalim stail bilong Lailai. Long wanem em i gat gutpela nokaut pans long lep na raithan bilong em. Em i bin soimaut dispela nokaut pans insait long 30 amata pait namel long 1977 i kam inap long las yia. Em i winim planti pait long nokaut tasol.

Sapos Lailai i was gut na stiaim dispela kain nokaut stail, em bai Arua i kisim taim nogut stret long 15 Februari.

Lailai i gat 21 krismas na em i bilong Aupwel Viles, Siassi Ailan long Morobe Provins. Em i tok em i no gat gutpela ekspirians long boksen olsem Arua. Em i tok em i rispektim Arua olsem wanpela smatpela boksa. Tasol dispela pasin bilong rispek na marimari i no inap kamap long taim em i bungim Arua insait long ring.

Arua i gat 23 krismas na em i bilong Wairavanua viles, Masal Lagun long Sentral Provins. Em i kamap amata boksa long yia, 1977 long taim em i gat 15 krismas tasol. Em i bin stap insait long 170 amata pait olgeta i kam inap long yia, 1984. Insait long 164 pait em i bin win long en, em i skoim 122 nokaut. Na em i lus 6-pela taim tasol.

## Plis tim i gat sans

BIKPELA GREN fainal resis bilong Gordens Ragbi Tas Asosiesen bai kamap long dispela wik Sande.

Seketeri bilong asosiesen Siviri Hauka i bilip bai moa long 500 pipel i kamap long Gordens Plis Barek oval long lukim ol dispela resis. Ol manmeri bilong Plis barek bai pulap. Long wanem bai "C" na "B" gret tim bilong Plis klap i go insait long gren fainal resis. Na Plis Komisina David Tasion bai kamap tu long givimaut bikpela sil bilong em wantaim ol tropi long ol wina.

Bala Raiders husat i lain junia man bilong kilim indai birua bai salensim Plis tim long "C" gret resis. Bai gat narapela tim bilong Plis klap i bungim sempian Sidesena tim long "B" gret resis. Na long "A" gret resis, Bala Raiders i sambai tasol long bungim wina bilong priliminari fainal resis namel long

**BEN WAUNS**  
i raitim

Plis na Soroka.

Plis na Soroka i bin dro 8-8 long fultaim long resis long las wik. Ol i go insait long narapela 10 minit bihain long fultaim. Tasol skoa i sanap wankaim yet. Long wanem tupela tim wantaim i pilai strong tru na tambuim narapela sait long skoim trai.

Reperi bilong pilai i kisim tok orait bilong tupela kepten na komiti bilong asosiesen long skruim dispela "A" gret resis i go long dispela wik Tunde. Ol pilaia bilong Plis tim i no laikim dispela tingting. Ol i bin toktok long go het na pilai narapela 40 minit moa wantaim Soroka. Tasol lain pilaia bilong Soroka i sotwin na i tok long bungim Plis long

Tunde.

Kosa bilong Plis tim, David Silovo i tok bai lain pilaia bilong em i daunim Soroka. Na bihain bai ol i bungim Bala Raiders long gren fainal. Tasol kosa na pilaia bilong Soroka, Archie Mai i tok tim bilong em bai autim Plis.

Wantok Niuspepa i no kisim skoa bilong dispela "A" gret resis long Tunde. Tasol husat tim i win i mas lukaut. Long wanem Bala Raiders i no wari long husat tim i salensim ol. Long wanem ol i redi enitaim.

Long "C" gret resis long las wik, Bala Raiders i nokimaut Soukuru 4-1 na Plis i memeim Soroka 4-0 long "B" gret.

David Silovo i tokaut bipo olsem Plis bai winim tripela taitel olgeta long displea yia. Em i tok Plis bai autim Bala long C gret gren fainal na tantanim Sidesena long B gret na pulim daun Bala long A gret.



1985/86 SEASON LADDER  
AT WEEK 14 ON 26/1/86Namba tu  
raun long  
Vanimo  
i pinis nau

NAMBA TU raun bilong Vanimo sof-bal resis i kirapim bikipela das stret long taun las wiken. Dispela em i bikipela pilai tru. Olgeta tim bilong man na meri i resis long kisim top ples bilong go insait long fainal nau.

Na ol pilaia na sapota i no klia yet long dispela taim olsem bai i gat namba-tri raun o nogat bipo long ol fainal i stat. Na nau birua i stap namel long ol dispela bikipela tim Sunam, Braun Igels, Bismak na Mediks.

Nupela tim Vanimo Fores Prodak i resis tu long kisim ples. Ol arapela em Sandau, Yunaitet na Kos-watas.

Tasol, planti pipel i ting olsem Sunam, ol lain kanai ya bilong Manus ailan i drip namel long bismak solwara bai autim Primia bilong Vanimo softbal bilong ol man long dispela sisen.

Tim menesa bilong Sunam, John Lokosi i glasim tu olsem Sunam tim bilong em bai karim Primia bilong ol man long Vanimo sof-bal. Long wanem ol pilaia bilong em i gat moa save, pawa na strong. Na ol arapela birua tim olsem Kos-watsa, na Braun Igels i save guria long salen-sim Sunam.

## A GRADE

Team	W	L	D	P
NissanGZ	11	0	3	23
B.Eagles	8	5	1	17
Malangan	6	5	3	15
NGI	6	5	3	15
Mazda	7	6	1	15
Yokomo	7	7	0	14
Elcom	6	6	2	14
I.Hawks	6	8	0	12
Kabiu	4	10	0	8
Fuji	2	12	1	5

## B GRADE

B.Eagles	12	2	0	24
Nissan	9	4	1	19
NGI	7	6	1	15
Mazda	7	6	1	15
ESA	7	7	0	14
Elcom	6	8	0	12
YMCA	6	8	0	12
Malangan	6	8	0	12
Chebu	5	8	1	11
Kabiu	3	11	0	6

## C GRADE

Aviat	10	1	1	21
Karanas	9	2	1	19
Adcol	8	4	0	16
Yokomo	8	5	0	16
Kerevat	7	5	0	14
Tarangau	4	8	0	8
Hansabay	4	9	0	8
Nissan	3	9	0	6
Fuji	1	10	0	2

## D GRADE

Bomana	12	2	0	24
SPIA	10	4	0	20
Insurance	9	4	0	18
A.Niugini	8	6	0	16
Manolos	7	5	0	14
ESA	6	6	0	12
YMCA	5	8	0	10
Chebu	4	9	0	8
Kabiu	2	10	0	4
Karanas	2	11	0	4

## E GRADE

B.Eagles	11	2	0	22
Aviat	9	3	1	19
Insurance	7	6	0	14
Saints	6	5	1	13
D.Sale	6	7	0	12
Yokomo	6	6	0	12
Manolos	6	6	0	12
Malangan	6	6	0	12
University	4	8	2	10
Tarangau	0	12	0	0

## Engliken yut volibol kompetisen



• Wanpela pilaia bilong Hohola i mekim stail na hamaim bal. Hohola yut i bin winim Gerehu 3-2.

OL YUT bilong Engliken sios insait long Mosbi i kamapim pinis wanpela volibol kompetisen namel long ol yet.

John Gegera husat i go pas long dispela i bin tok olsem dispela kompetisen i bilong kisim ol yut membas bilong Engliken sios insait long Mosbi long kam bung wantaim na amamas.

Em i tok tu olsem dispela pilai i bin strongim ol yut na long traime na mekim gutpela sindaun.

I'm  
**KILOMETRICO\***

I write  
thousands  
and thousands  
and thousands  
of words!  
Try Me!



- \* Leak Resistant
- \* Quality controlled ink flow for tropical climates
- \* Tungsten carbide ball for easy writing flow
- \* Strong durable construction
- \* Extended writing life
- \* Stylish and efficient

Available in Fine and Medium points in Blue & Black & Red.

**KILOMETRICO**  
by  
**PAPERMATE**  
REGISTERED TRADEMARK



# Kapit i go antap long namba tu ples

KABIU i tanim plet long Demons long-taim oli krungutim Demons 6-2 long A gret Womens Softball long Mosbi. Dispela i givim ol wan stap i go antap na ol i level wantaim Demons na Eksels long namba 5 ples bilong poin lata.

Kabiu i mekim namba wan ran bilong ol namba tu ining. Yet long taim Demons i painim trabel liklik long bat. Pitsa bilong Kabiu, Judy Koliias i givim 3-pela K-tu long ol Demon.

Demon i skoim namba wan ran bilong ol long namba-4 ining. Na namba tu long namba-5. Ol i painim trabel long kisim hom bes bikos ol rana bilong ol i aut tasol long namba tu o namba tri bes.

Planti pipel i ting Demons bai autim Kabiu. Tasol win i senis. Lucy Havae ketsa bilong ol Kabiu na Dulcie Made i bin pilai gut tru. Lucy i moa yet long paitim bal na em yet i skoim 2-pela ran. Dulcie i pait tasol, em i painim

isi tru long kisim bal. Na em i bin paitim bal gut tru las wik. Ludi Kauri i bin was long namba wan bes.

Judy husat i top pitsa bilong ol Kabiu, i swingim bat na bal i flai i go pundaun aut sait tru long lep fil. Judy Koliias i givim stret na mekim hom ran.

Demons i painim trabel liklik long bal i go olsem long sot stap. Tasol yet ol i gat gutpela nem yet. Ol yangpela lain pilaia bilong ol tu i gat hatpela we long pilai. Nau bikpela bilong ol Pole Kassman i givim strong nau long ol pailai long namba tri bes.

Long ol arapela pilai bilong A Gret. Masda i stap lida yet. Las wik ol i autim Sankaro 20-4 na ol i gat 26 poin istap antap long lata. Wantok i go daun long Kapit. Kapit nau i abrusim ol na krungutim namba tri ples. Las wik pilai sko bilong olsem. Kapit 6 na Wantok -5.

Gasel nau i stap long 4 ples long taim ol



Sato wanpela pilaia bilong Fuji i givim tru dispela bal taim ol pilai wantaim Honda Igels. Tasol Igels i bin win 9-2.


daunim Eksels 8-6. Na Wantok namba- tu tim i memeim Agogol 15-5. Agogol nau i save painim taim tru bikos ol i no gat kosa nau.

Molly Pouru i no moa helpim ol. Na nau ol i stap las tru long lata wantaim 3-pela poin tasol.

Mosbi softball bi-

long ol meri bai pinis long 22 Februari. Ol i gat 4-pela wiken tasol i stap long pilai. Na ol fainal bai stat long Mas, 1.

## Samart i autim Pinto



Lupe Pintor bilong Meksiko (raithan) i tormoi han long Samart Payak-Arun bilong Tailan insait long resis bilong tupela long kisim bantam wet taitel. Dispela pait bilong tupela i bin kamap long Tailan na Wol Boksin Kaunsil i bin go pas long dispela pait bilong ol. Samart i bin autim Pintor long namba 5 raun. Na nau em i wol bentam wet sempian.

Softbal skoa ol meri: A Gret Sarere 25 Januari.

**B Gret**  
Mediks 7 Spia 13  
Plis 4 Wantok 15  
Manalos 7 Yokomo 0  
PNGBC 14 Malanga 4

**C Gret**  
Kerevat 0 ANG 7  
Insurens 7 Aviat 4  
Kabiu 5 Chebu 17  
ESA 10 Hansabay 5

**A Risev**  
Adcol 6 Manalos 15  
Malangan 17 Gasel 10  
Kapit nil Insurens 7

Yokomo 4 Kapit 5  
Agogol 5 Wantok 15  
Masda 20 Sankaro 4  
Demons 2 Kabiu 6  
Gasel 8 Eksels 6  
Kapit 6 Wantok 5

### A Gret Meri Poin Lata

Tim	Poins:
Masda	26
Kapit	22
Wantok	21
Gasel	15
Demons	12
Eksels	12
Sankaro	8
Yokomo	5
Agogol	3

### Ol man skoa 26/1/86

#### Diamond 1

ESA 6 Chebu 10  
Yokomo 5 Kabiu 3  
Fuji 2 B.Eagles 9  
Elcom 4 Mazda 5  
Malangan 1 NGI 2  
Nissan 22 I.Hawks 1

#### Diamond 3

YMCA 4 Bomana 5  
Chebu 8 B.Eagles 9  
ESA 3 Malangan 9  
Nissan 7 YMCA 5  
Mazda 20 Kabiu 3  
Elcom 0 NGI 10

#### Diamond 2

Kabiu 0 SPIA 7  
Hansabay 7 Tarangau 0  
Insurance 1 Manolos 5  
Yokomo 12 Fuji 5  
Karanas 14 Nissan 5  
Adcol 8 Kerevat 11

#### Diamond 4

Karanas 5 A.Niugini 14  
Aviat 15 Uni 4  
D.Sale 3 Saints 7  
Malangan 12 Manolos 4  
B.Eagles 12 Yokomo 5  
Tarangau 0 Insurance



### SOFBAL DRO - MEN

WIK 15 - SANDE 2 FEBRUERI, 1986

#### DIAMOND 1

Taim	Tim	Reperi
9.00	ESA V SPIA	S.P'reket
10.30	Malangan V Elcom	A.Girana A.Hara
12.00	Fuji V I.Hawks	I.Tovia S.Atao
1.30	Mazda V B.Eagles	C.Bais M.Tako
3.00	Yokomo V NGI	R.Ratia M.Tako
4.30	Nissan V Kabiu	M.Tagilai G.Madao

#### DIAMOND 3

9.00	Bomana V Manolos	L.Bola
10.30	YMCA V B.Eagles	M.Solo Y.Hira
12.00	Chebu V NGI	L.Paivu P.Tonga
1.30	Nissan V Kabiu	J.Aisa L.Kamara
3.00	ESA V Elcom	N.Simba T.Raymond
4.30	Mazda V Malangan	L.Iara Nagata

#### DIAMOND 2

9.00	YMCA V A.Niugini	I .Daniel
10.30	Hansabei V Aviat	J.Hasun
12.00	Nissan V Tarangau	E.Koniel
1.30	Karanas V Kerevat	F.Miso
3.00	Adcol V Fuji	L.Kaminie
4.30	Insurence V Chebu	Tamti

#### DIAMOND 4

9.00	Karanas V Kabiu	Aviat
0.30	Uni V D.Sale	H.Keket
12.00	Yokomo V Malangan	P.Philipo
1.30	Tarangau V Aviat	T.Pelis
3.00	Insurance V Saints	R.Misiel
4.30	B.Eagles V Manolos	J.Wrtovo

#### YOKOMO BYE

#### Club:

Time - Steward - Umpire  
9.00 - M.Pupun - Kerevat  
10.30 - M.Solo - Chebu  
12.00 - W.Daniel - Elcom  
13.30 - F.Miso - ESA  
15.00 - M.Kalas - Mazda  
16.30 - A.Hara - Tarangau

## MOSBI SOFBAL DRO - OL. MERI

SARERE 1 FEBRUERI, 1986

### A GRET

TAIM	TIM	REPERI
10.30	Yokomo V Gazelle	C.H'kins
12.00	Kapits V Demons	K.Tigllai
1.30	Kabiu V Sankaro	H.Kila
3.00	Excels V Agogol	E.George
4.30	Mazda V Wantoks	G.Pearse
4.30	Kabiu V Gazelle	R.Kassman

### A RISEV

12.00	Adcol V Malangan	A.Kerepia
1.00	Kapit V Manalos	E.Kalas
3.30	Mazda V Gazelle	F.Bundu


### B GRET

12.00	Wantok V PNGBC	T'ngau
1.30	SPIA V Tarangau	Wantoks
3.00	Manolos V Malangan	Medics
4.00	Yokomo V Medics	M'ngan

### C GRET

10.30	Chebu V Aviat	Kerevat
12.00	Hansabay V Kerevat	Aviat
1.30	ANG V Insurance	ESA
3.00	Kabiu V ESA	ANG





**1. TRIPOLI, INDIA**

— Dispela meri soldia i holim wanpela AK-47 raifel bilong Rasia na sanap i stap ausait long ples we ol meri i save trening long kamap soldia bilong ami bilong Libia.

**2. NU YOK, AMERIKA**


— Pasquale Consalvo na meri bilong em Angelina i amamas moa yet bikos ol i winim K30 milion insait long laki tiket pilai. Ol tupela i bin amamasim namba 37 yia bilong marit bilong tupela i stap long taim ol i lukim tok save long televisen olsem ol i winim dispela mani.

**3. FILAPELFIA, AMERIKA**

— Bisop Desmond Tutu bilong Saut Amerika i toktok long ol pipel bilong Amerika long hevi em kantri bilong em Saut Afrika i painim nau bikos long lo bilong ol i kolim apetaid. Dispela lo i tok olsem ol waitman na blakskin pipel i no mas sindaun wantaim. Ol waitman i bosim kantri na olgeta samting.

**4. KRAISES, NU SILAN**

— Robert Swann (lephan) husat i lida bilong wanpela projek ol i kolim "In the footsteps of Scott" i holim medal em ol i bin kisim. Swann na Roger Mear (raithan) i bin go raun long Saut Pol na tupela i kam bek gen long Nu Silan.



**MASERU, LESOTO** — Ol dispela lain pipel i amamas raun long ol strit insait long Maseru bihain long taim ami bilong kantri i tekova na autim gavman bilong Praisim Minista Leabua Jonathan long Mande 20, Januери.



**CO-AIR**  
 Co-ordinated Air Services Pty. Ltd.  
 We know Morobe Province best. As of September 1st, 1983 we have started our scheduled services. The routes to be covered are:  
 Lae to Finschhafen on Tuesday, Thursday and Saturday.

Lae to Lablab and Siassi on Tuesday, Thursday, and Saturday.  
 Lae to Tabubil and Kiunga every Friday.  
 Lae to Menyamyam and Aseki on Monday, Wednesday Friday and Saturday.  
 Paul Curry or Keith Thomas  
 Phone: 42 3233  
 P.O. Box 1257 Lae.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.